


BANKÓMBÓ YA KOTÚKA

 Matondi, Ndeko Neville. Oyo ezali lokola li—likambo moko ya mpwasa mpo na ngai. Nasengelaki kozala awa te lelo. Kasi, mpokwa ya lelo ezali mpokwa ya elambo, mpe na—mpe nakanisaki ete náya na ntongo oyo. Nabengaki Ndeko Neville, mpe alobaki: “Ee, sikawa, soki ozoya awa,” alobaki, “mpo na nini kaka te óloba na biso mwa moke?”

² Mpe namilobelaki, ee, soki naye, mpe ekokaki kosalema, nakolinga koteya te, kasi nakosepela kolobela mwa moke na losambo na ntina na makambo oyo, boyebi, oyo namoni ete ekoléndisa losambo.

³ Touti kozonga na mobembo na biso ya—ya bokila ya automne, ngai ná bandeko, oyo bazali awa, mpe tolekisaki ntango moko ya nkembo. To—tozongisi matondi mingi mpenza, biso nyonso totóndi na esengo, mpe—mpe tozuaki banyama oyo tokendeki koluka na bokila. Mpe—mpe mokengeli na biso ná ngai toyebi ete nyama ya zamba ezalaka mpenza, mpenza elengi. Na boye tozuaki bambuli ya malamumu. Mpe ngai nazuaki ngombólo moko ná mbuli mibale. Mpe tozongaki.

⁴ Mpe oyo esengeli kozala eleko oyo nasengeli kolobela Bilembo nsambo oyo ya nsuka. Kasi basilisi naino koléngela ndako-a-nzambe te. Mpe ezali na eloko moko oyo esálaki ete básilisa te. Bongo, nakanisi ete engumba nde ezali kotungisa biso mwa moke, mpo tozángi esika oyo esengeli mpo na mituka, kokokana na motángo ya bato oyo tozali . . . oyo ndako-a-nzambe ekoyamba.

⁵ Tozali na mposa ya kotonga ndako-a-nzambe ya sika awa, mpe tozali na eteni monene ya mbongo oyo esili koléngélama, mpe—mpe mpo na kotonga nda—ndako-a-nzambe ya monene koleka. Kasi ntango tozalaki na mayangani oyo, ee, bososoli ndenge ezalaka. Ezalaka mawa mingi mpenza. Bato batelemi zinga-zinga na bitutu, libanda na mbula, mpe—mpe—mpe ezali mpenza mpási. Mpe ata baninga na ngai mpenza bazali koloba mabe mpo na yango. Balobaki: “Ndeko Branham, emonani lokola bango . . .” Moninga na ngai ya monganga alobaki: “Emonani lokola okoki koluka esika mosusu.” Alobaki: “Esalaka ngai mawa, ntango bato balekaka wana.”

⁶ Infirmière moko, na ndako elandi oyo ya ngai, alobaki: “Ee, nalekaki wana na ntongo moko, na ngonga ya mitano. Osengelaki kozala wana . . .” Mpe alobaki: “Bato basilaki kosangana zinga-zinga na ndako-a-nzambe yango kuna, na ngonga ya mitano ya ntongo. Yo osengelaki kozala kuna na ngonga ya libwa na ndambo.” Boye, bomoni, mpe ekómisaka yango mpati.

7 Mpe tolingi ndako-a-nzambe oyo ezali na mwa bisika, mpe epai oyo bato nyonso bakoki kofanda. Mpe biso tokanisaka tozobika na mikolo ya nsuka, tondimaka yango. Ete esika. . . Tosengelaki koteya kolakisáká ma—ma—makambo oyo na Lingomba, makambo oyo ebandi kosalema, makambo oyo esakolamaki, misusu kati na yango, esali nkoto na nkoto. Mpe ekokisi koleka mibu ntuku mibale na mitano to ntuku misato, uta na losambo oyo, makambo mosusu esakolamaki ete ekokokisama. Sikawa tozali komona yango kokokisama. Boye, tosengelaki kokanisela makambo yango lisusu, kasi tozángi esika oyo esengeli. Boye na ntongo oyo. . .

8 Nazalaki kosala bato na telefone mpe nyonso wana, lobi, mpe nazali na mwa mosusu ya kosala, nsima ya nzanga oyo, mpe bongo na bongo. Na nsima nazalaki na mwa bato oyo bazalaki na mposa ya komona ngai, elenge mobali moko malamumu, oyo motó na ye eningani, azali ndeko motei na elanga ya mosala. Bazali mingi, ndenge wana, ná ndeko moko ya Norvège. Mpe—mpe tozalaki na masolo ya moto na moto na eteni ya ndako kuna na nsima. Nalobaki: “Ee, sikawa, tokobima libanda.”

9 Mpe Ndeko Neville alobaki: “Ee, tokokende koloba mwa maloba moke mpo na koléndisa Lingomba mwa moke.” Ya li- . . .

10 Moko na makambo ya liboso oyo nalingi koloba. Nakomáki mwa makambo awa na lokasa, ete, ntango nakokóma na losambo, nalingaki koloba yango. Likambo moko oyo nakomáki awa etali liwa ya ndeko na biso ya malamumu Taylor, ntango tosilaki kokende.

11 Ndeko Tarylor azalaki koya na losambo oyo mibu na mibu. Nandimisami ete biso nyonso toyebaki ye. Kasi soki mwa bapaya bazali awa, ezalaki mobange mobali ya motuya wana oyo azalaki ntango nyonso kolukela bato kiti, ya kofanda. Ndeko Taylor, mbala ya nsuka oyo namonaki ye, kino mokolo nakomona ye azóngi elenge, azalaki ya kotelema wana na ekuke eleki pene na Lomongo misato to minei. Alobaki: “Nazali na mposa ya mwa babuku, Ndeko Branham. Nakolinga kokabola ba-buku yango.” Boye biso, ye. . .

12 Oyo nasósoli ezali ete, azalaki na diabete mpe akótaki na comá, mpe kozanga. . . koyeba te ete azalaki na diabete. Mpe—mpe ezalaki. . . Akufaki. Akufi ata moke te. Akei nde kozala elongo ná Nkolo Yesu.

13 Azalaki ndeko moko sembo mpe malamumu mingi, ntango nyonso komitungisa mpo na bato mosusu. Mpe esengo na ye ezalaki kolukela bato esika ya kofanda, ntango bayei na losambo. Mpe boyebi, ntango mosusu, ntango tokokátisa na ngámbo ya Lopango, ekozala malamumu komona lisusu Ndeko Taylor kuna, kolukela biso esika ya kofanda, na ngámbo mosusu, boye te?

14 Nakanisi, mpo na kokanisa Ndeko Taylor . . . Nazalaki awa te mpo na kosolola na ntina na yango ná Ndeko Neville, na matánga na ye, kasi nalingi koloba mwa maloba ya matondo, epai ya mwasi na ye oyo akufeli mobali. Ndeko mwasi Taylor, nabanzi, azali awa na esika moko boye na ntongo oyo, motema na ye ya sembo épambolama!

15 Ndeko Taylor, mokolo moko alobaki: “Yaka kotala ngai kuna. Natimólaki láki moko kuna, natiaki mwa bambisi na kati na yango, mpo óya kolóba kuna.” Azalaki ntango nyonso komitungisa mpo na bamosusu. Mpe Moto moko azalaki komitungisa mpo na ye, ezalaki Klisto, mpo na kopesa ye lobiko.

16 Nakanisi, mpo na kokanisa ye, ata bongo, mpo na losambo oyo, wana esangani lokola nzoto moko na ntongo oyo, tótelema elongo, tógumba mitó liboso na Nzambe.

17 Tata na biso na Likoló, biso lokola bato na ntongo oyo, ná baoyo to—toyaka na esika ya kosambela oyo . . . Loboko na Yo ya nkembo esali katikati na biso mpe elongoli moko na bandeko na biso ya motuya, oyo tolingaka, mpe toyebi ete Yo mpe olingáki ye. Mpe Ozalaki na ntina moko mpo na kosala nyonso oyo, Nkolo, soki te elingaki kosalema ndenge wana te, koyeba ete Biblia na biso eyebisi biso, ete: “Makambo nyonso etámbolaka elongo mpo na bolamu ya baoyo balingaka Nzambe.” Mpe ye asalaki bongo.

18 Totali bipai na bipai, na mokili, mpe tomoni ndenge bokeli etalisaka biso makambo na ndenge nyonso, ete nkunda ekoki kokanga ye te, mpamba te, na mokili, akokisaki ntina oyo Otindaki ye awa. Azalaki ndeko moko malamú, ya bosémbo.

19 Tomoni yango na bomoi ya milóna, mpe na bomoi ya moi oyo ebimaka na ntongo mpo na kopesa biso pole. Na katikati ya moi ekómaka na mibu ya moto oyo akóli. Na nsima, na mpokwa, ekúfaka lisusu, kaka mpo na kosekwa lisusu na ntongo oyo elandi, mobesu mpe ya sika, mpo ekokisi mwango ya Nzambe.

20 Tomónaka ndenge ba-folólo ebimaka, ekómisaka mabelé kitoko mpe ebongisaka bisika ya matánga, mpe bisika ya mabála, ekokisaka mwango na yango; efungolaka motema na yango mpe ekabaka ofele, mafuta na nzoi, ná malási na balekinzela, kitoko na baoyo balukaka yango. Epésaka nyonso oyo ezali na yango, na mosala ya Nzambe, na nsima egúmbaka mwa motó na yango. Kasi soki eleko ya printemps ekoki, esékwaka lisusu, mpo ekokisaki mwango ya Nzambe.

21 Bongo liboso na bozalisi nyonso, ná Biblia, ná elaka, ná Molimo Mosanto, tokoki mpenza kosepela na mitema na biso, koyeba ete Ndeko na biso Taylor mpe, Nkolo, akokisaki mwango ya Nzambe. Koloba ete ye akosekwa lisusu te, ekozala nde kowangana Biblia na biso, Nzambe na biso, ná makambo nyonso oyo Nzambe asilá kopésá biso mpo na kotala, koyeba ete lisekwa moko ezali. Boye tozali kozela na kotalela ntongo oyo tokomona

ye lisusu, ntango akokóma elenge, na nzoto kolongono mpe akobela lisusu te to akokóma lisusu mobange te.

²² Pámbole mwasi na ye ya motuya, moninga na ye ya sembo. Tokozánga bango mpenza, na ntango molai, Nkolo, ndenge tozalaki komona bango kokende elongo na etíma-na-mai, mpe kofanda na mwa bibóngá kuna, kolóbókó mbisi, mpe kosolóláká, mpe ndenge balinganaki mingi mpenza.

²³ Sikawa toyebi ete Mokolo ya monene ezali koya, oyo bilombe ya kondima bakosála lífílí mpo na kokóta na ekuke monene ya elonga, mpe Banje ya . . . bakotondisa mipepe na banzembo. Tokomona bango lisusu na esika wana.

²⁴ Kino na ntango wana, Nkolo, pésa biso mpiko. Pámbole biso mpe sunga biso. Tokozánga Ndeko Taylor na ntango molai, mpe moto nyonso oyo ayáka na losambo oyo, wana azalaki kotelema na ekuke mpo na koluka esika mpo na baoyo bazalaki koya koyoka Liloba na Nzambe, mpo báfanda malamú mpenza.

²⁵ Mokolo wana ntango akufaki, Nkolo, nabondelaki ete mokonzi monene na Banje ya Nzambe átelema wana na ekuke, mpo na kolukela ye mpe esika, Nkolo, mpo ákoka kofanda. Mpamba te ekomami na Biblia: “Baoyo bayókelaka bato mawa bakoyókela bango mawa.” Kino tómona ye, Nkolo, tika ete bikaniseli na ye ékóba kitoko kati na mitema na biso, kino mokolo moko ntango tokokutana lisusu na Mboka mosusu. Kati na Nkombo na Yesu Klisto tosengei yango. Amen.

²⁶ Tokozanga ye ntango molai katikati na biso ná katikati na bapaya, mpe bongo, baoyo bayaka na losambo na biso, to na ndako na biso awa, mpo na kosambela. Tika ete elimo na ye épema na kimia liboso na Nzambe, kino na Mokolo yango.

²⁷ Mokolo moko, moko na moko na biso mpe tokokende, moko na moko, kino ntango ngala na biso ya kokende ekokoka, ndenge wana. Sikawa, wana tozali na ntango, ná makoki, tómilengela mpo na ntango oyo ezali koya; mpo toyebi te ntango yango ekosalema. Toyebi te nani akolanda na nsima. Tika ete tóbika na lolenge ete mokolo na mokolo, soki esengeli kokómela biso, soki ekómi ngala na biso, tokozala tomilengeli.

²⁸ Sikawa, nakolinga kopesa mayebisi. Sikawa, kala mingi te, mbala mosusu, ntango mosusu, nasololi naino ná bayangeli misolo te, banda nazóngi awa, na oyo etali liséngeli ya botongi nda—ndako-a-nzambe awa, to oyo tosengei kosala na nsima, kobongisa ndako-a-nzambe na biso mpo tókoka kosala mayangani na biso. Bongo nakokóba, bólimbisa ngai, ná—ná Bilembo Nsambo, mpe na nsima Mbeki Nsambo, ná makambo mingi oyo tosengei kolobela, noki-noki.

²⁹ Sikawa, mokolo ya Lomongo na ntongo, kuna, nasengeli kozala na Elizabethtown, na Kentucky, elongo ná Ndeko L. G. Hoover, na—na mosala ya kobulisa. Ezali mpo na kobulisa tabernacle ya sika, to tabernacle oyo bauti kosomba na

Elizabethtown, na Kentucky. Okolanda nzela 62 kino ókoma na Elizabethtown, to nalingi koloba, nzela 31, to koleka na nzela monene ya kofuta. Kaka na matákanelo, ekomema yo na Elizabethtown. Ezuaka pene na ngonga moko. Ezali na ntaka ya kilometre ntuku mitano na mitano to ntuku motoba kino kuna. Nakanisi, ezali pene na kilometre ntuku motoba, na nzela . . . ya nzela 31, mpe pene na kilometre ntuku mitano na mitano, to eloko moko bongo, na nzela mosusu, koleka na nzela monene ya kofuta. Ezali na Balabala Mulberry.

³⁰ Mosala ya kobulisa. Ndeko Hoover akoteya na eteyelo ya Lomingo ya momesano na ngonga ya zomi. Mpe ngai nasengeli koteya na mosala ya kobulisa, kobanda ngonga ya zomi na moko kino na midi, mokolo ya Lomingo oyo, mokolo ya zomi na moko na sanza ya Zomi na moko.

³¹ Na etanda ya mayebisi, li—likambo yango ezali kuna. Ekozala na . . . Bokoki komona nzela oyo ekomema bino kuna. Ezali na Balabala Mulberry. To ba—bakomi ndenge ya kokóma kuna na . . . Ezali kuna, na etanda ya mayebisi, liboso na ndako—anzambe.

³² Na bongo, mokolo mwa—mwa ntuku mibale na mibale na—na sanza ya Zomi na moko, na—nasengeli kozala na Shreveport, na Louisiane, mokolo mwa ntuku mibale na mibale, ntuku mibale na misato, ntuku mibale na minei, ntuku mibale na mitano, ná—ná mokolo mwa ntuku mibale na motoba. Mikolo mitano, nakanisi, na Shreveport, na Louisiane, na Life Tabernacle. Epai ya Ndeko Moore. Bazali kosepela yubilé na bango ya wólo. Lipamboli ya Pantekote ekitaki na Shreveport, na Louisiane, eleki mibu ntuku mitano, mokolo mwa ntuku mibale na mibale ya sanza oyo. Eleki mibu ntuku mitano, nsango ya liboso ya ba—Pantekotiste etéyamaki. Mpe ekitaki, Molimo Mosanto ekitaki, na Louisiane. Bazalaka na ekaniseli ya likambo yango, mpe oyo ezali yubilé ya wólo. Mpe nasengeli koteya na yubilé yango, mpokwa mitano, elongo ná Ndeko Moore, na Shreveport, na Life Tabernacle.

³³ Soki bozali na baninga kuna to pembeni na yango, ee, soki bolingi kokomela bango, to eloko moko ya ndenge wana, tokosepela kozala elongo ná bango kuna. Bóyebisa bango na ntina na mayangani oyo ezali koya.

³⁴ Mpe Life Tabernacle, soki moto moko asilá kokende kuna epai ya Ndeko Moore, azali moto moko malamumu mpenza. Bato malamumu mingi bazalaka kuna, bato malamumu wana ya Sudi. Tóloba, bato ya malamumu koleka bango bazali te. Na bongo, Life Tabernacle, moto nyonso oyo afándaka zingazinga na Shreveport akoki koyebisa bino esika yango ezali. Shreveport ezali na bato pene na nkóto nkama mibale. Mpe ezali engumba moko kitoko, ná bisika ebele ya koyamba bapaya. Boye . . .

³⁵ Mpe tabernacle yango ezali tabernacle monene, tabernacle monene mpenza. Ezali na ba-étage, ba-balcon, ná eyanganelo ya monene, ná eyanganelo mosusu lisusu. Bisika ezali mpenza ebele. Etalani mpenza ná auditorium monene ya engumba, oyo ezali na bisika ya kofanda nkóto mitano. Ezali kaka—kaka lokola kokatisa balabala awa, mpo na kokóma na auditorium monene ya engumba.

³⁶ Mpe Rev. Jack T. Moore, to—to Life Tabernacle ya Shreveport, na Louisiane. Ekobanda mokolo mwa ntuku mibale na mibale. Ekozala mokolo ya Mis- . . . ya Minei kino ya Lomingo. Mokolo ya Minei, ya Mitano, ya Mpóso, ya Lomingo, mikolo minei na esika ya mitano. Bólimbisa ngai. Ekozala mokolo mwa ntuku mibale na mibale, ntuku mibale na misato, ntuku mibale na minei, mpe ntuku mibale na mitano. Nakanisi ezali ndenge wana, na—na sanza ya Zomi na moko.

³⁷ Na nsima, tokoyeba bongo oyo etali, oyo tosili kosala na ntina na ndako-a-nzambe awa, mpo tóyeba ndenge ndako-a-nzambe epusani na oyo etali kotongama na yango. Batongi bayebisi biso ete bakoki kozua basali mingi mpo na kosala mosala yango, na lolenge ete pene na mikolo zomi, tóloba, bakoki kosilisa yango mpo tókota, bomoni, noki-noki. Bazali kaka kozela ete engumba étia linzaka. Boyebi, tosengeli kozala na esika oyo esengeli mpo na mituka, ná biloko *mosusu* mingi. Mpe, oh, la la, tosengeli kokokisa makambo mingi oyo letá aséngi, mpo na kobanda kotonga ata eloko nini. Kasi nakosepela koya lisusu na losambo liboso názonga na elanga ya koteya.

³⁸ Sikawa, babengisi ngai na Tanganyika, na Ugánda, mpe na bikólo ya zinga-zinga. Joseph abongisi ete mayangani yango ébanda na sanza ya Mibale.

³⁹ Mpe lobi, ntango nakómaki, bandeko mosusu, Ndeko mwasi Thoms ná bamosusu, oyo bauti na mikili mosusu, basilaki kokóma. Mpe ezalaki na . . . Nakutaki mwa mokanda moko na ekuke na ngai, to—to mokanda ya mbela oyo euti na—na lisanga moko ya Afrika ya Sudi. Boye, nazokomela bango mpo na koyeba eloko nini ekoki kosalema. Ntango mosusu, wana nakozala mosika kuna, nakoki kokita na Afrika ya Sudi, ntango mosusu, na nsuka ya sanza ya Mibale mpe ya Misato, na ntango wana.

⁴⁰ Mpe tozali kolikia ete ndako-a-nzambe ekosila kotongama, mpo nákoka kolobela Bileko ya Lingomba oyo, liboso—liboso eleko ya hiver ébanda, soki ekokoka. Soki te, to nasengeli kosala yango ntango nakozonga, ntango nakouta kuna, soki Nkolo Yesu aumeli.

⁴¹ Lobi, nazalaki koyoka, ntango nazalaki kozua, nabanzi ezalaki liboso na lobi, nazalaki koyoka bande moko. Nakanisaki ete nazalaki koyoka yango kobeta awa na ntongo oyo. Elenge ndeko moko ya Sudi azalaki na . . . Mama na ye ayaki na liyangani. Azalaki na tumeur monene na libele, mpe azipamaki

na elilingi ya liwa. Mpe Molimo Mosanto, na moko na mayangi oyo euti kosalema, na Southern Pines, nabanzi, to na esika moko boye, ayebisaki ye, alobelaki tumeur na ye, nani ye azalaki, mpe epai wapi ye autaki. Mpe Alobaki ete azalaki na mwana mobali moko oyo azongaki nsima na kondima, ete alingaki kosala likama, mpe balingaki koloba ete amibomi na nko te. Mpe makambo mingi ya ndenge wana. Mpe elenge mobali oyo . . .

⁴² Nyonso wana ekokisamaki mpenza ndenge wana. Mpe tumeur ya cancer na ye, to, kútu, evimbá ya tumeur na ye etikaki te. Kútu, evimbá ya tumeur ezali cancer, boyebi. Boye, e—etikaki ye. Mpe elenge mobali yango akómaki kosamba mpo na likambo ya koboma moto na nko te, mpe nyonso kaka ndenge Molimo Mosanto alobáká yango. Mpe akambamaki epai na Klisto, lisusu. Mpe asalaki bande na yango, mpe ngai na—nayokaki yango kobeta. Bosepelaki na mwa elobeli wana ya Sudi? [Losambo balobi: “Amen.”—Mok.] Alobaki: “Awa na Caroline du Nord,” alobaki. Oh, nalingaka yango mingi, bato ya Sudi wana. Mpe azalaki na . . . Nkolo akóbaki kopambola ye mpenza. Alobaki: “Nayebi ete olobaka ete oteyaka malakisi te, Ndeko Branham; bobele na eyanganelo na yo.” Alobaki: “Biso tozali eteni ya eyanganelo na yo.” Boye, ezalaki mpenza malamumu mingi, ete áloba bongo.

⁴³ Sikawa ezali na fotó moko, nakanisi, ntango mosusu, ezali na etánda ya mayebisi na ntongo oyo. Soki ezali te, Billy akotia yango kuna. Mbala mingi, bato balobaka, ntango nabandáki koloba na ebandeli, bazalaki koloba: “Ezali kaka mabanzo na yo, Ndeko Branham, ete omonaka Pole yango, Pole yango.” Ntango mosusu ekoki kozala . . .

⁴⁴ Bamosusu bakoki naino kozala awa, bato ya kala mpenza, baoyo bazali komikanisela yango, liboso bákanga Yango ata fotó. Ezali na moto moko awa oyo azali koyeba lisusu ntango ezalaki ngai koloba yango, kala mpenza? Bótala. Pene na maboko minei to mitano mpamba. Ndeko mwasi Spencer awa, ná Ndeko mobali ná Ndeko mwasi Slaughter, ná—ná ndeko mobali oyo, ná ndeko mobali wana. Bazali pene na mitano to motoba, bato ya kala oyo batikali.

⁴⁵ Ee, sikawa, nsima na mwa ntango, líso ya mekaniki ya ekangeli camera wana ekangáki fotó yango. Boye, ekendeki na Washington DC, banganga-mayele bayékolaki yango, mpe balobaki: “Basangisi biloko mibale te, to eloko moko te.” Balobaki: “Pole ebetaki objectif yango.” Wana ezali maloba ya George J. Lacy. Nkombo na ye etiami wana. Bomoni?

⁴⁶ Ee, na bongo, mbala mingi boyokaka ngai, kotala mpe koloba: “Elílingí moko ya moindo ezali likoló na moto oyo. Azipami na elílingi ya liwa.” Bato boni basilá koyoka ngai koloba bongo? Mbala mingi, bomoni, mbala mingi. Ee, esalemaki ete ekangeli fotó nde ezuaki yango. Na bongo, tozali na yango awa.

47 Mwasi moko ayaki epai ya ndeko mwasi moko mpe ayebisaki ye likambo yango, na mayangani ya—ya Caroline, epai wapi tosálaki mayangani ya malamumu mingi, na Southern Pines. Mpe kuna, mwasi yango azalaki kobunda na liwa ya cancer na mabélé nyonso mibale. Mpe minganga basilaki kosundola ye. Mwasi yango agúmbamaki mpe akangáki ye fotó, kaka ntango naye bisaki ye nani ye azalaki, mpe esika ye autaki. Mpe nalobaki: “Elilíngí moko ya moindo ezipi yo. Ozipami na elilingi ya liwa.” Mpe mwasi yango akangáki yango fotó. Mpe yango wana, liso ya mekaníki ya ekangeli fotó, ezui elilingi ya liwa.

48 Soki bamosusu kati na bino basílá kotala filme oyo *Mibeko Zomi*, bomónaki mwanje na liwa, ndenge ezalaki koya, elilingi wana, ya moindo mpe nsómo, ezali na fotó yango. Mpe nakanisi etiami na etánda ya mayebisi sikawa. Soki ezali te, Billy azali koyoka ngai, ee, bóyebisa ye átia yango na etánda ya mayebisi. Mpe batii likonga moko mpo na kotalisa moto yango. Mpe moto yango, elilingi yango etikaki mwasi yango, mpe abikisamaki na ndenge ya kokamwa. Kasi eloko moko lokola ekoti to molínga ya moindo esanganaki mpe ezipaki mwasi yango, etelemi likoló ya cancer yango boye, kouta nde kuna. Na ntembe te, elilingi yango nde esika liwa ezali kosopana mpe, uta na cancer yango.

49 Ee, ata omeki koyebisa bato Solo ndenge nini, ekozala na moto moko oyo akozala kokanisela ete Ezali Solo te. Mpe soki olobaka ntango nyonso Sólo, na bongo oyebi ete ozali—ozali koloba sólo.

50 Nazali na moninga moko oyo azali mo—mobókoli bibwele na lisobe monene, kuna na Westi. Mpe—mpe mosala ya bobáteli environnement yango esombaki motoneige na ba-dollar pene na nkóto minei, mpo na kotánga ba-nyama oyo wapiti, oyo batikalaki na Valleé ya Troublesome. M. Jeverez oyo asílá koya awa na losambo, nakambaki ye epai ya Klisto, azaláká mozangi kondima monene. Mpe boyóká ngai kobeta lisolo ya ntango oyo tozaláká kotambwisa mpunda elongo. Azaláká kondima eloko mosusu te, kaka makanisi ya Darwin. “Likambo ya Mwana oyo abotamaki na mongondo, ezalaki bolema.” Mpe mokolo mosusu wana na butu, totiaki moláko mpenza na esika oyo andimeláká Klisto.

51 Na bongo mobali yango ayébisaki bango. Alobaki: “Sikawa, bozali na ntina ya kosomba motuka to motoneige yango te.” Alobaki: “Ngai nakoyebisa bino mpenza motángo ya ba-wapiti oyo bazali kuna.” Alobaki: “Bazali zomi na libwa.” Alobaki: “Bazalaki ntuku mibale na- . . . Bazalaki ntuku mibale na moko, mpe nabomaki mibale.” Mpe azalaki kosolola na mobateli ya banyama ya zamba. Azalaki na ndingisa ya koboma kaka moko. Bongo alobaki: “Bazalaki ntuku mibale na moko, mpe nabomaki mibale. Batikali zomi na libwa.”

Mpe alobaki: “Iyo, Jeff, nayebi ete yo moto obomáki mibale.”

Alobaki: “Ezali bongo.”

⁵² Ee, bazuaki motoneige yango, bakendeki kuna, banyama yango ezalaki zomi na libwa. Alobaki: “Billy, yo yebisa kaka moto bosolo; akondima yango te.”

⁵³ Boye ezalaka na yango ndenge wana, tóloba. Okoki koyebisa bato Solo, kasi ata bongo bango. . . Kososola mabe mpe—mpe kokosa ekoti mingi na makambo na lolenge ete bandimaka te ete ozali koloba Solo ntango oyo ozali koyebisa bango Solo. Bomoni?

⁵⁴ Kasi biso tozóngisi matondi mingi na lolenge ete tozali na Tata moko na Likoló, Oyo atátolaka Solo yango ná litatoli. Ezali solo. Boye, soki lelo nde mokolo na ngai ya suka na mokili, bo. . . ata boluki-luki mpe bandangá ya zébi esili kokotalisa polele ete nalobáki Solo na ntina na makambo oyo. Ya solo. Ezali Solo. Boye, ntango mosusu ekotiana na etánda ya mayebisi. Billy, ozali kuna na biró? Ozali na yango na loboko na yo, fotó yango? Mpe soki ozali na yango, ee, yaka na yango awa, bongo, okoki kotia yango awa, ntango mosusu bakomona yango. Ee, nayebi te. Mwinda moko ekopelisama na—na etánda yango.

⁵⁵ Mpe fotó yango ya—yango oyo awa. Nabanzi ete bozali komona yango te. Kasi *awa* bokoki komona elilingi ya liwa likoló na motó ya mwasi yango. Mpe maloba oyo babakisi na ntina na yango, yango oyo *awa*, esika mwasi wana akangaki fotó yango, mpo na kotala soki ekomonana mpenza. Mpe yango wana, likoló na—na yango. Ezali elilingi ya liwa na lolenge ya ekoti.

⁵⁶ Omoni mwasi yango, oyo wana mpenza? Bomonaki yango, nabanzi, Ndeko Neville, boye te? [Ndeko Neville alobi: “Iyo.”—Mok.] Ah-hah.

⁵⁷ Boye, ntango mosusu Billy akotia yango na etánda ya mayebisi, soki okolinga, Billy. Yaka kozua yango, mpe mema yango na liboso mpe tia yango na etánda, mpo moto nyonso ákoka komona yango ntango bakobima. Ye to Doc, moko to mosusu. Sikawa nakanisaki, ntango mosusu, ekoki komonana polele mpenza ete bokoki komona yango, kasi molili eleki makasi mpo na fotó ya lolenge wana. Kasi akotia yango kuna, mpo bókoka komona yango, ntango bakobima.

Sikawa, bómikanisela mayebisi nyonso.

⁵⁸ Sikawa, na ntongo oyo, nakanisaki ntango mosusu ete tóloba mwa moke likoló na eloko moko mpo na kopesa mpiko na lingomba, eloko moko oyo ekopesa bino lisusu. . .

⁵⁹ [Ndeko Doc Branham alobi: “Ozali na mposa ya mwinda wana?”—Mok.] Olobi nini? [“Olingi ete tótalisa mwinda yango likoló na yango?”] Iyo, Doc, soki okolinga. Ekoki kozala malamumu.

⁶⁰ Nalingi kosalela oyo awa. Nazalaki na. . . Bisika mosusu ezalaki na minda te, na mpóso eleki, boye tokanisaki ntango mosusu ete ekongenga mwa malamumu koleka mpo na lelo.

nalingaki kolobela yango, mpo etalelaki ndoto moko oyo—oyo ndeko mwasi moko azuaki.

⁶¹ Nazali komituna soki Ndeko mwasi Shepherd azali na losambo na ntongo oyo. Nakutanaki na ye mokolo wana na mpokwa. Mpe ezalaki mbala ya liboso oyo namonaki mwasi yango, mpenza, nayebaki kutu ye te. Azali awa? Nabanzi azali te. Iyo. Ekotungisa yo, ekozala nde libanda na molongo, soki nalobeli ndoto yango, Ndeko mwasi Shepherd? Ekotungisa yo te, boye te? Malamu. Ezali malamu.

Mpe liboso tólobela yango, tógumba lisusu mitó sikawa.

⁶² Tata na Ngolu na Likolo, topesi Yo masanzoli mpo na bolamu mpe mawa na Yo nyonso. Sikawa, kitisa mitema na biso, Nkolo, mpo tókoka koyekola Liloba na Nzambe ya bomoi, wana Eyeli biso na nzela na emononeli mpe etatolami na Molimo Mosanto, endimisami na Biblia. boye tobondeli ete Ópesa biso lisosoli, mpo tókoka koyeba nini kosala na mikolo ya nsuka oyo, wana tozali komona banguya ya mabe kozingela biso sikawa. Etumba, etumba ya nsuka ekomi pene na kobundama. Sunga biso, Nkolo. Wana babundi ya solosolo mpe ya makasi, sala ete tókoba kotombola nguba ya Kondima, ná Liloba na Nzambe, Mopanga, mpe kokende liboso. Na Nkombo na Yesu. Amen.

⁶³ Sikawa, nazali na likanisi ya kokende liboso, na etumba, ndenge ba—batandamaka na ndelo ya etumba, nabelemi mpo na kobanda yango, e—etumba ya solosolo, kobunda etumba ya kondima.

⁶⁴ Ndeko mwasi Shepherd oyo, ná Ndeko mobali Shepherd, bazali mpenza baninga na biso ya malamau mingi, mpe bayaka na tabernacle oyo. Mpe bazali bana ya motuya mpo na Nzambe. Mpe—mpe Ndeko mwasi Shepherd oyo, ntango nazalaki kozua mikanda na ngai, oyo Billy akoki koyanola, soki moto moko alobi: “Tindela ngai motángo boye ya bilamba ya mabondeli.” Mpe nabondeli mpo na bango. Ayanolaka na yango. Kasi soki mokanda yango etindami kaka na ngai, nasengeli koyanola na yango ngai moko, bomoni. Boye, nazuaki mikanda oyo ya ngai moko, na bongo nazalaki komema yango na ndako. Mpe nazalaki kotánga yango, elobaki: “Euti na Ndeko mwasi Shepherd.” Mpe ezalaki ndoto moko oyo ye alotáká, e—eleki mwa basanza. Mpe azalaki mpenza kososola yango malamau te, kino eleki Lomongo mibale to misato, ntango nateyaki malakisi na ntina na—na *Bileko Nsambo Ya Lingomba* ná—ná bambuma nsambo, na Petelo ya Mibale, lolenge oyo elobi, na Petelo ya Mibale 1: “Kobakisa likoló na kondima na biso.” Bomoni?

⁶⁵ Ya liboso, na mobóko, ezali Kondima. Ya mibale, bakisa na kondima na yo, nguya; na nguya na yo, boyébi; na boyebi, komipekisa; na komipekisa, motema molai; na motema molai, bosantu; mpe na bosantu, bolingo na bandeko, boboto na bandeko; na nsima bolingo, oyo ezali libanga ya motó. Makambo

nsambo wana. Bileko nsambo ya lingomba, bomoni, ná minzoto nsambo ya bileko ya lingomba, mpe nyonso wana etongami na nzela ya Molimo Mosanto.

⁶⁶ Sikawa, wana nde oyo yango eséngaka mpo na kokóma mosali ya Klisto. Klisto atongi Lingomba na Ye na kati na bileko nsambo ya lingomba; Mwasi na Ye ya libala, Moto, mwasi, Lingomba. Bileko nsambo ya lingomba epesi mpe esali Mwasi na libala. Bamoko uta na eleko *oyo*, bamosusu uta na eleko oyo *wana*, mpe bamosusu uta na eleko oyo *wana*, mpe bango nyonso elongo nde basali yango na lolenge ya piramide.

⁶⁷ Lokola Enoka, oyo atongaki ba-piramide, ndenge tondimaka. Mpe libanga ya motó etikálá kotiyama likoló na yango te, mpo libanga ya motó esiláká koboyama. Mpe totalisaki yango, lokola Mateyo te, kasi mpo na kososola, kaka mpo na losambo oyo. Ete oyo . . .

⁶⁸ Nzambe amikómisaka Ye moko be na misato. Amikómisaki be na “Tata, Mwana mpe Molimo Mosanto,” misala misato ya Nzambe moko. Amikómisaka Ye moko be na “kolóngisama, kobulisama mpe libatizi ya Molimo Mosanto,” ezali misala mibongi be ya ngolu. Amikómisaki be na boyei misato: mbala ya liboso, mpo na kosikola Mwasi na Ye ya libala; mbala ya mibale, mpo na koyamba Mwasi na Ye ya libala; mbala ya misato, na Millenium elongo ná Mwasi na Ye ya libala. Mpe makambo nyonso ebongaka be na misato. Mpe nsambo ezalaka motángo ya kokumbamela ya Nzambe. Nzambe akumbamelamaka na nsambo, akokaka mpenza, abongaka be mpe akokaka mpenza.

⁶⁹ Mpe likambo ya kokamwa ezalaki ete, ezali te mpo na kokotisa yango, kasi bobele mpo na kolakisa bino, mbuli ya nsuka oyo nazuaki azalaki na nsóngé mitano na ngámbo moko mpe misato na ngámbo mosusu; bomoni, ngolu ná bobongi be.

⁷⁰ Sikawa bótala likambo oyo, na ntina na Klisto. Nzambe akomáki Biblia misato. Biblia ya liboso ezalaki na likolo, ebengami zodiak. Sikawa, soki oyebi Buku ya Yobo te, bósana na yo likambo yango, mpamba te, mpo Yobo nde moto alimboli yango, ntango atómbolaki miso mpe apesaki nkombo na biloko yango oyo ezalaki na likoló.

⁷¹ Mpe bótala, na zodiak, ebandaki na nini? Eloko ya liboso na zodiak ezali mongondo. Eloko ya nsuka na zodiake ezali Leo nkosi. Boyei ya liboso ya Klisto, ezalaki na nzela ya mongondo. Boyei ya mibale, Leo nkosi, Nkosi ya libota na Yuda.

⁷² Na nsima Enóka atongáki, na eleko na ye, to na eleko wana, piramide ya mobimba. Mpe eko . . . Na ntembe te, tozali na ntango ya kotia mobóko na yango te, mpo na kotalisa ndenge piramide yango etongamaki kino ná ba-chambre mpe bongo na bongo. Etalisaka mpenza tee kino ntango ya suka oyo sikawa. Bakómi na kati ya chambre ya mokonzi sikawa, kokokana na bipímelo yango. Kasi libanga ya motó etikáláká kotiyama na

sóngé ya piramide te. Yango etele mi malamú be, na oyo etali architecture to—to botongi. Kino, ata . . . mwa lotébú ya moke mpenza . . . Bayebi ndenge etongámaki te, basósolaka yango te, bakokaki ata te kokótisa lotébú na mipanzi, epai oyo basengelaki kotia potopoto. Mpe potopoto ezalaka kati na yango te. Etiamaki mpenza esika moko, na kobonga be.

⁷³ Boye, ezali mpe bongo, ntango Klisto ná Lingomba bakómi moko. Potopoto ezalaka te na katikati. Eloko moko te ezalaka na katikati; bobele Nzambe ná moto yango. Nzambe, Klisto, ná moto yango.

⁷⁴ Sikawa, kasi, libanga ya motó, batikálá komona yango te. Boyebi Libanga ya Scone oyo bazalaka na yango na Angletterre, mpo na kobúlisa bakonzi, to ko—kolatisa bango motolé, mpe bongo na bongo. Kasi libanga ya motó . . .

⁷⁵ Bótala lokasa ya dollar moko ya Amerika. Bokomona soki . . . na lokasa ya dollar moko ya Amerika, na ngámbo moko, na ngámbo ya mwasi, batiá elembo ya Amerika, mpóngó ná . . . asimbi makongá na loboko, na ngámbo ya mibale, babéngaka yango elembo “ya Etats-Unis”. Kasi na ngámbo mosusu ezali piramide mpe, likoló na yango, liso moko ya monene, mpe na nsé na yango bakomi: “Elembo ya monene”. Mpo na nini ezali “Elembo ya monene” na ekólo oyo, ata likoló na elembo ya ekólo na biso? Bomoni?

⁷⁶ Ata bosali nini, Nzambe akosala ete éloba kaka ndenge moko. Bomoni? Asalaka ete mosumuki álobela yango. Asalaka ete ekólo élobela yango. Nyonso esengeli kolobela Ye. Ó—ólinga kondima Yango to te, Ezali mpenza wana.

⁷⁷ Sikawa, bótala, liso moko ezali na kati na yango, liso ya Nzambe. Mpe lokola libanga ya motó etiamaki te, Elembo ya Motó, lokola Eboyamaki, oyo ezalaki nde Mwana na Nzambe; Libanga ya litúmu ya ndako, Elembo ya Motó ya piramide, ná nyonso wana. Sikawa—sikawa, nazali . . . Nalingaka te ko . . .

⁷⁸ Mbala mosusu, batiaka makambo oyo na bande, mpe ekómaka katikati na bandeko na mangomba, na mangomba mosusu. Na ntango basili bongo, boye ntango mosusu bandeko yango bakanisaka mabe, bakanisaka ete nazoloba likambo moko na ntina na bandeko. Kasi ezali bongo te. Ngai . . . Soki bokoki mpenza koyoka mpe kosósola, bokomona ete nazoloba mabe na ndeko moko te. Mpamba te, ezali malamú te ete bandeko bálobenaka mabe bamoko na bamosusu. Tosengeli nde koloba bolamu bamoko na bamosusu, kasi kotelemelana te.

⁷⁹ Kasi mbala mosusu ntango nalobelaka ebongiseli moko boye, ndakisa ba-Presbytérien, ba-Methodiste, to bamosusu, balobaka: “Bomoni, azotelemela yango.” Natelemelaka te ndeko mobali oyo azalaka kuna, to ndeko mwasi oyo azalaka kuna. Système oyo ezokaboláká bandeko nde yango ngai Natelemelaka. Bana

na Nzambe bazali libota moko, kasi—kasi bitóngá oyo ekeseni te.

⁸⁰ Mpe bamosusu kati na bango balobaka: “Nazali na ntina na yango te, mpo ezali ba-Presbytérien. Mpe ngai nazali Metodiste.” Bomoni? Sikawa, ezalaka bongo te. Bomoni? Ezali likambo ya système ya ebongiseli wana, nde ebúkaka bondeko yango. Bomoni?

⁸¹ Sikawa, oyo wana, ndenge nalobaki, soki ozali kotiola na ebale, na kati ya mwa bwato moko ebéba, mpe ozali komeka kokatisa babwéta, mpe ngai nayebi ete oyo wana ekosimba te, ee, na ntango wana, nazogánga te mpo na kopámeláká yo. Nazoluka nde kobimisa yo na bwato yango. Bomoni? Mpamba te, bwato yango nde ekopanzana, mpe—mpe—mpe okotikala yo moko na kati ya mai. Boye—boye, ezali te—ezali te ndeko oyo azali na kati ya bwato, kasi nazogánga nde epai na ndeko yango mpo na kotalisa ye likambo oyo elingi kosalema.

⁸² Ee, ba-système nyonso oyo, oyo bato basili kosala na mayele na bango esengeli kopanzana. Esili wana. Esengeli kokóma . . . Tosengeli kokóma na bomoko, na bondeko. Yango ntina oyo nalandaka na bomoi na ngai, ezali ya komeka kosangisa, kopanza ebongiseli moko te, kasi kosala ete bátika makanisi na bango, mpe bákóma bandeko mpo na Moklisto nyonso oyo abotami mbala mibale. Bomoni? Yango, yango nde likanisi. Wana nde esika natelemi, ee, sikawa, soki bandeko bakoki komona yango. Ngai . . .

⁸³ Bandeko na biso mingi, ata na mangomba na biso ya Litondi ya Nsango-malamu, bandimaka te ete ba-Batiste, ná ba-Metodiste, ná ba-Lutherien ná bamosusu, bazalaka na libaku malamumu. Kasi, sikawa, bakoki kozala na elonga. Kasi ngai nandimaka yango te. Nandimaka ete eleko oyo, Eleko ya Luther, na eleko yango, *awa*, oyo ebéngamaki, nabanzi, Eleko ya Sálade. Na nsima, Eleko ya Filadelefi, oyo ya ba-Metodiste. Na nsima, Eleko ya ba-Pantekotiste, ya Laodikia. Nandimaka ete wana ezali bileko. Mpe Nzambe, na bileko yango moko na moko, azalaki kozua libota oyo eponami. Mpe na yango, ndenge Baebele 11 elobi, ete: “Bango, kozanga biso, bakobonga be te.” Bomoni? Kasi sikawa Lingomba ebandaki na *boye*, ezalaki kokóma moke malembe-malembe, kino ntango Ekómi na eleko ya ba-Pantekotiste.

⁸⁴ Sikawa, ntina oyo nazali koloba boye, ezali mpo bókoka kozua likanisi na likambo oyo ndeko mwasi alótaki. Mpe ndoto na ye ekokani mpenza na oyo ngai nazalaki koteya.

⁸⁵ Bótala sikawa awa, sikawa, makambo nyonso oyo Petelo ya Liboso mokapo ya 6 mpe molongo ya 7 eyebisi bino, koband- . . . na kondima na bino, yango nde eloko ya liboso. Sikawa, nalobaka ete bato balobaka ete bazali na banguya yango kozanga kutu kobotama mbala mibale. Mpe nabanzi nalobaki

likambo moko ya makasi ntango nalobaki: “Ezali lokola ndeke oyo babengi merle ezoluka komikotisa nsala ya ndeke oyo paon, mpo ámikómisa paon.” Akoki kolóna te. Asengeli kobimisa nde nsála ya solosolo. Kati na ye nde esengeli kobimisa nsala yango.

⁸⁶ Mpe ntango nyonso, bato bafundaka ngai ete nalobelaka makasi ntango nyonso bandeko na biso ya basi, ndenge bakátaka suki, mpe ndenge bapakolaka-pakolaka bilongi na bango, ná nyonso wana. Bato balobaka na ngai ntango nyonso ete nalobaka makasi mpo na bandeko na biso ya basi. E—ezali te ete nazali na likambo moko ya kotelemela yango. Nazoloba te ete mwasi yango azali mwasi malamú te, ete azali mwasi ya ndumba te eloko moko boye. Wana ezalaka lolenge na ngai te. Kasi, ezali boye, ntango abakisaka na libanda biloko mingi oyo esalemi na bato, elakisaka ete biloko oyo ezalema na bato etondi mingi mpenza na kati, bomoni, na esika asengelaki kotondisama na Klisto. Mpamba te, libanda etalisaka ntango nyonso oyo ezali na kati. “Bokoyeba bango na mbuma na bango.” Bomoni? Mpe esika oyo Klisto asengelaki kozala kuna na kati, mpe kosepela na makambo ya Nzambe, mpe kosepela na makambo mosusu na esika ya makambo mingi oyo esalema na bato, boyebi, mposo ya miso ya lángi ya mpondu, mpe kobongola lolenge ya moto, ná makambo nyonso ya ndenge wana. Nasepelaka na yango te, mpe nandimaka te ete Biblia esepelaka na yango, na bongo, nalingaka tózala kaka oyo tozali.

⁸⁷ Botala, sikawa, soki mwasi azangi manzáka, mpe alingi kotia yango; soki azangi míno, mpe asengeli na yango; soki ozangi loboko, mpe osengeli na yango; soki ozangi suki, mpe osengeli na yango; soki ozangi makambo yango, oyo wana ezali ndenge mosusu. Kasi ntango olongolisi míno na yo ya malamú solosolo, mpo ezali mpenza mpembe te na ndenge esengelaki kozala, na ntango wana osali mabe. Soki ozali na nsuki ya motane, mpe olingi ete ézala moindo, mpe okei kotiesa yango langi ya moindo, kaka mpo na yango; osali mabe. Iyo, ngai nakanisaka bongo. Kasi likambo ya motuya. . . Ezali na Likomi moko te mpo na yango. Kasi, mpo na kokáta nsúki na bino, Likomi ezali mpo na yango, iyo, ezali ebele mpenza, na bongo, tolingi kondimisama ete ezali mpenza bongo, sikawa.

⁸⁸ Sikawa, ndeko na biso ya mwasi, na ndoto, alótaki ete ye. . . Ee, liboso, azalaki komitungisa. “Ntina nini kokoba kokende liboso, mpe komeka kosala makasi na bomoi mobimba, soki Nzambe asengi biso ete tóyamba Molimo Mosanto mpe biso tozali na Yango te?” Sikawa, nabanzi te. . .

⁸⁹ Ntango mosusu bazali kotia yango na bande. Kasi soki te. . . Soki bazali kotia yango na bande, ezali bobele mpo na losambo oyo. Bomoni? Sikawa, soki ndeko moko azui bande oyo, mpe oyoki mongongo na ngai, ndeko, na likambo oyo, bóbosana te nazali bobele koteya malakisi na losambo na ngai. Bino, ntango nyonso, liboso na biyanganelo na bino, bóyokaka ba—ba-bande

yango malamumu, mpe soki olingi te ete eyanganelo na yo éyoka yango, kotika te ete báyoka yango. Kasi ngai nazali kaka komeka koloba na etonga moke oyo, ete—ete Ndeko Neville ná ngai, na nzela na Molimo Mosanto, tozali komeka ko—kozala mokengeli na bango mpe koteya bango.

⁹⁰ Sikawa, makambo mosusu ezali oyo ntango mosusu bokoki kondima yango ata moke te. Boye, soki ezali, kaka ndenge nalobaka na ntina na kolia soso bakálinga: “Soki okómi na mokuwa, okobwaka soso yango te. Okobwaka nde mokuwa yango.” Na bongo, bósalaka ntango nyonso bongo. “Soki ozali kolia tarte aux cerises, mpe okómi na mokókóli, okobwaka tarte yango te. Okobwaka kaka mokókoli.” Boye, bósala ndenge moko na kokoyokáká Likambo oyo.

⁹¹ Sikawa, na—nandimi ete—ete—ete ntina oyo mobúlungano ekómi mingi lelo, na ntina na Molimo Mosanto, ezali mpo malakisi yango eteyamaka malamumu te. Nakanisi ete libatisi etéyamaka . . . mpe balobaka kaka “libatisi”.

⁹² Kasi boye ezali lokola koloba “motuka.” Kasi sikawa nazali na ba-mécanicien ebele na losambo oyo, kasi ngai nayebi eloko moko te na ntina na yango. Boye soki nasali libunga, bandeko, nazali . . . Bóbosana te, nazali mécanicien te. Esengeli kozala na ba-bobine, ná ba-bougie, ná ba-vis platinée, ná ba-soupape, ná biloko mosusu nyonso, mpo sála motuka.

⁹³ Mpe soki ozali kolobela libatisi ya Molimo Mosanto, makambo mingi etámbolaka elongo ná Yango. Hah? Bomoni? Makambo mingi etámbolaka elongo ná Yango. Mpe ngai nakanisi ete Nzambe azali kondimisa ete: Molimo Mosanto ezali awa. Bomoni?

⁹⁴ Sikawa, Petelo alobaki, liboso, “Kondima.” Sikawa bótala yango malamumu mpenza. Malakisi yango nde tolingi koteya na miníti moke. Sikawa, kondima ezali eloko na yo ya liboso. Na kondima na yo, bakisa nguya; na nguya na yo, bakisa boyébi; na boyébi na yo, bakisa komipekisa; na komipekisa na yo, bakisa motema molai; na motema molai na yo, bakisa bosantu; na bosantu na yo, bakisa bolingo na bandeko, boboto na bandeko; na nsima bakisa bolingo. Mpe moto nyonso ayebi ete bolingo ezali Nzambe. “Nzambe azali bolingo.” Bomoni?

⁹⁵ Sikawa, na bongo, longwa na oyo, na nsima kokótisa yango na bileko nsambo ya lingomba. Nzambe azali kotonga, na bileko nsambo ya lingomba, Mwasi na libala mpo na Klisto; koleka na Filadelefi, Tuatila, na Pelegamo, na Sumuluna, mpe na Efese. Eleko ya lingomba, oyo Yesu alobaki: “Soki—soki Mobali na libala ayei na bokengeli na butu ya liboso to na bokengeli na butu ya nsambo, bangondo nyonso balingaki kolamuka.” Esalemaki bongo. Balamukaki, bangondo ya Efese, Sumuluna, Pelegamo, Tuatila, Salade, Filadelefi mpe Laodikia. Bomonaki yango? Na eleko ya nsambo nde Ayaki kolamusa bangondo oyo balálaki.

Yango ezongisi bango kino na nse *awa*. Bomoni? Mpamba te, na kati na yango, na kati ya mibu, ya bileko yango, nde Asili kotonga Mwasi na libala, aboti Mwasi na libala, Aboti Mwasi na libala na mokili mpo na Klisto. Mpe kaka ndenge moko oyo Aboti Mwasi na libala oyo, Asili kobota bato moko na moko.

⁹⁶ Sikawa nazali kopesa yango mobóko, mpo bósosola ntango ndoto ya ndeko mwasi ekolobama.

⁹⁷ Sikawa, makambo oyo esengeli mpenza kozala na kati ya Moklisto liboso Molimo Mosanto ékoka kotíá yango elembo, liboso likambo oyo ékita likoló na yango mpe ésalá bomoko na mobimba.

⁹⁸ Sikawa, ndoto ya ndeko na biso ya mwasi. Azalaki komitungisa soki azalaki na Molimo Mosanto to te, ntango alálaki na kanapé epai mobali na ye azalaki kotánga zulunále. Mpe azali na bana mike, lokola ngai, mpe basálaka ntango nyonso makelele ná nyonso wana. Na bongo, na kati na yango, alálaki pene na miníti zomi, to zomi na mitano. Mpe alotaki ndoto. Azalaki kokoka kosósola yango ata moke te, to koyeba ndimbola na yango te, eleki pene na mobu mobimba, kino ntango Nsango oyo eteyamaki. Bongo, ntango nazalaki koteya Yango, mobimba na yango ezongelaki ye. Alotaki ete azalaki kobondela.

⁹⁹ Azalaki kotámbola, liboso, liboso álota ndoto yango, mpe azalaki komínyolusa maboko, mpe azalaki kokanisa: “Nkolo, nazali na Molimo Mosanto? Okoki kotalisa ngai polele. Bamoko balobaka: ‘Mpo na—nagángaki.’ To bamosusu balobaki: ‘Mpo nalobaki minoko na sika.’ Mpe tondimaka nyonso wana. Kasi ngai nazali mpenza na Yango?”

¹⁰⁰ Nandimaka makambo nyonso wana, banguya wana, koloba minoko na sika, kogánga, mpe kotalisama ndenge na ndenge. Nandimaka makambo yango nyonso mpenza. Kasi soki ozali na yango kozanga *Oyo*, eloko moko ezali kotambola malamumu te. Bomoni? Sikawa, bomoni, bomoni, bo—bozali na mposo. Bótala malamumu.

¹⁰¹ Mpe azalaki komitungisa mpo na yango, na bongo, alálaki na kanapé, epai mobali na ye azalaki kotánga, mpe azuaki mpongi.

¹⁰² Mpe alótaki ete azalaki likoló na ngomba moko. Mpe na ngomba oyo, ya malamumu koleka . . . nazali na lokasa yango liboso na ngai te, kasi nakanisi ete ezali boye. Alotaki ete amonaki e—engóngóló moko ya libanga, lokola—lokola mo—motóndo, efandi mpenza na songe ya ngomba yango. Mpe mobali na ye azalaki na nsima na ye. Mpe amonaki mobali moko ya monene ateleme wana, alati bilamba ya mosala, agúmbaki maboko ya elamba, azosopáká mai ya peto koleka nyonso oyo asilá komona, kosopáká yango na kati ya engóngóló oyo, engóngóló ya libanga oyo ezalaki na sóngé ya ngomba yango. Kasi engóngóló ya libanga yango ezalaki kobátela mai te. Ezalaki kotiola mpe kobima libanda na yango, kotoka mpe kolongola bosoto mpe

matiti yango nyonso, mpe nyonso oyo ezalaki na kati kuna, mpe koytoka mpe kobimisa yango mpe komema yango na nse ya ngomba. Mpe etiólaki likoló ya makolo na ye, atelemaki na kati na yango, kasi ezalaki kokangama na nzoto na ye te.

¹⁰³ Na—na bongo atúnaki mpo na nini engóngóló yango ezalaki kokanga yango te, mpe mobali yango alobaki: “Wana ezali mai te. Wana ezali Molimo Mosanto, mpe,” alobaki, “eloko moko te ekokanga Yango.” Mpe alobaki, na nsima ye mobali azongaki mpe azuaki katini mosusu ya monene, mpe etondaki na mafuta ya nzoi, mpe asopaki mafuta ya nzoi na kati na yango, alobaki: “Sikawa ekokanga yango.” Mpe akanisaki ete engóngóló yango, ezalaki engóngóló ya libanga, ekopanzana mpe ekosopa mafuta ya nzoi, kasi epanzanaki te. Sukasuka ekangamaki mpe ekangaki yango.

¹⁰⁴ Abalukaki mpe akitaki na ngomba. Ntango azalaki kokita ngomba, atelemaki na nse ya ngomba mpe abwákaki miso na nsima. Amonaki mikelé mitano ya mai ya peto, lokola kristal, oyo ebebisamaki te na biloko oyo elekaki kati na yango, ezalaki kaka peto mpe kitoko, kotioláká na lombangu. Na nsima ekitisaki mbangu ya kotiola. Na nsima, ekómaki pene na kokauka, mpe azalaki komituna soki ekokóma na nsé ya ngomba, mikelé mitano yango. Mpe alamukaki.

¹⁰⁵ Nakanisi ete ezalaki bongo, boye te, Ndeko mwasi Shepherd?

¹⁰⁶ Sikawa, kaka ntango nazuaki mokanda yango mpe nafungolaki yango, liboso nátánga yango, namonaki ndoto na ye.

¹⁰⁷ Ndenge wana nde bandóto elimbolamaka. Sikawa, mingi kati na bino boyaka epai na ngai na bandóto, mpe—mpe boyebisaka ngai makambo na ntina na bandoto. Nalobaka: “Zela naino. Olobaki yango naino na mobimba te.” Bomoni? Mpe nazongaka nsima mpo na kozua yango. Na bongo, soki okoki te koloba likambo oyo olótaki, ndenge nini okoyeba soki ndimbola ezali bongo to té? Bomoni? Osengeli, osengeli komona ndoto yango. Emononeli esengeli kotalisa ndoto yango. Mpe ntango omoni ndóto oyo moto yango alótaki, mpe okoki koloba yango liboso ye áyebisa yo yango, na bongo okoyeba ndimbola na yango.

¹⁰⁸ Ee, nandimi ete ezali na kati ya Makomi, mpe, Daniele, mokolo moko. Ezalaki bongo, boye te? Alobaki . . . Iyo. Nakanisi ete euti koyela ngai na likanisi. Bomoni?

¹⁰⁹ Kasi okomona ntango nyonso ndoto yango, soki ndimbola na yango ezali malamumu. Moto moko abandi koyebisa yo ndoto, okoki kotelemisa ye mpe koloba: “Zela naino. Ezalaki *boye na boye*. Ezalaki *boye na boye*, kobakisa *boye na boye*.”

Na bongo okoloba: “Ezali mpenza bongo.” Bomoni?

110 Mobali moko, mokolo mosusu, azalaki komeka koyebisa ngai ndoto oyo alótaki. Alobaki: “Ee,” alobaki. . .

Nalobaki: “Sikawa, ndeko, mpo na nini otikaki eteni mosusu wana?”

Alobaki: “Eteni mosusu nini?”

111 Nalobaki: “Olotaki ete obwakaki libanga moko na likoló, mpe ngai nabetaki yango masasi mpe biteni mosusu ekotaki ngai na líso.”

112 Alobaki: “Ezali mpenza solo, Ndeko Branham.” Mpe bauti kolongola eteni na yango ya nsuka kaka lobi. Iyo.

113 Boye ezali yango mpenza. Bomoni? Bomoni? Mpo na nini? Olobi bosolo na yango nyonso te, kasi, bomoni, Emonisaka yango lisusu ntango nyonso, eloko oyo, eyebisaka yo ndoto na yo, likambo oyo olótaki. Na ntango wana, okoyeba ete ezali bongo.

114 Sikawa, ndimbola ya ndoto na ye yango oyo. Azalaki komitungisa na ntina na Molimo Mosanto. Sikawa, engóngóló oyo amonaki likoló na ngomba, ezalaki libanga. Engóngóló ya libanga, ezali *libanga*, “eyambweli”. Sikawa, ndenge Yesu alobaki na Makomi. Alobaki, Petelo alobaki. . . “Nani,” Yesu nde alobaki, “bato balobaka ete Ngai, Mwana na moto, nazali nani?”

“Moko alobaki ete Ozali ‘Eliya’, mpe ‘Mose’, mpe bongo na bongo.”

Mpe Alobaki: “Kasi bino bolobaka ete Ngai nazali Nani?”

Alobaki: “Ozali Klisto, Mwana na Nzambe na bomoi.”

115 Sikawa, bato mosusu balobaka, lingomba Katoliko elobaka, lingomba Katoliko ya Roma elobaka, ete ya Ye eyamb- . . . “Oyo libanga yango ezalaki, ezali oyo Yesu alobelaki ete: ‘Likoló na libanga oyo Nakotonga Lingomba na Ngai, mpe bikuke na ewelo ekolóna Yango te.’” Bango balobaki: “Ezalaki likoló na Petelo. Ete Petelo azalaki libanga yango, mpo *Petelo* elingi koloba ‘libanga moke.’ ‘Likoló na libanga oyo Nakotonga Lingomba na Ngai.’” Mpe likolo na Petelo nde bango, bokitani ya bantoma, batongáki lingomba.

116 Bongo lingomba Protestant elobaka: “Ezali lokuta. Ete, Atongaki Lingomba likoló na Ye moko.”

117 Sikawa, ezali te mpo na kozanga boyokani, kasi, ngai, na ndenge na ngai ya komona, bango nyonso mibale bazali na libunga. Mpamba te, Atikalá kotonga Yango likolo na Petelo te, mpe Atongáki Yango likoló na Ye moko te, kasi likoló na emonisi ya Petelo ya Nani Ye azalaki. Bomoni?

“Bato balobaka ete Ngai Mwana na moto nazali Nani?”

“Ozali Klisto, Mwana na Nzambe na bomoi.”

118 “Esengo na yo, Simona, mwana na Yona. Mosuni mpe makila emonisi yo yango te,” likindo moko boye te, bomoni, “kasi Tata na Ngai oyo azali na Likoló nde amonisi yo yango. Yo ozali

Petelo. Likoló na libanga oyo ya eyambweli, likoló na emoniseli yango nde Nakotongwa Lingomba na Ngai.”

¹¹⁹ Mpe kobanda wana, eleko ya lingomba moko na moko ezalaka na libanga ya eyambweli yango, kino na libanga ya eyambweli oyo ya Laodikia.

¹²⁰ Mpe, sikawa, okoki kosala lingomba ya bulee te. Lingomba ya bulee to ebongiseli ya bulee ezalaka te. Molimo Mosanto ekoki koteyama kati na yango, kasi na kati kuna bokomona bato malamú ná bato mabe, bato na nkanza, batioli, mpe nyonso wana. Na bongo, ebongiseli ekoki kotelema te. Okoki koloba te: “Biso nde tozali na Yango. Lingomba moko te kati na mangomba mosusu ezali na Yango.” Te, misie. Molimo Mosanto esopanaka likoló na moto na moto. Ezali likambo ya moto na moto.

¹²¹ Boye, yango wana, libanga yango, Lingomba ya Pantekote ya mikolo ya nsuka oyo esili kozua Molimo Mosanto, oyo bango bazuaki na ebandeli. Na bileko nyonso, bato bazuaki Molimo Mosanto, kasi ezalaki na mosánda te ya oyo bazali na Yango sikawa, mpo ezali bozóngisami ya oyo ya ebandeli. Ndenge toyekolaki na ntina na bitémelo ma miinda, Alifa mpe Omega, lolenge bazalaki kopelisa mwinda ya liboso; móto yango ezalaki komata se komata, mpe ekómaki kokufa malembe malembe; na nsima ezóngaki lisusu. Bomoni? Ya liboso mpe ya nsuka, mpe bongo na bongo.

¹²² Sikawa, kasi na eleko ya lingomba oyo, Nsango ezali kosopana na kati na lingomba. Kasi nzoto ya lingomba, yango moko, na mobimba mpenza lokola . . .

¹²³ Tabernacle oyo, tóloba. (Mwasi yango ayáka na losambo awa.) Tabernacle oyo ezali mongombo ya Molimo Mosanto te. Eloko ya boye ezalaka te. Bato moko na moko oyo bayáka na losambo oyo nde bazali mingombo ya Molimo Mosanto. Bango nde mingombo oyo Molimo Mosanto afándaka kati na bango, kasi ezali te lingomba lokola nzoto, etóngwa. Na yango, Etiolaka mpe ebimaka libanda.

¹²⁴ Kasi, nde, moto oyo azalaki kosopa mai, motindami na lingomba azalaki kosopa Nsango na kati ya lingomba, kasi mai yango ezalaki kosala nini? Ezalaki kotoka mpe kobimisa bosoto nyonso oyo ezalaki kati na yango. Yango nde Molimo Mosanto esálaka, etokaka mpe ebimisaka nyonso wana.

¹²⁵ Sikawa, mafuta ya nzoi ezalaki kotalisa bolingo na bandeko, boboto na bandeko, elingi koloba eleko oyo. Nauti kolobela yango, bomoni, na ntina na boboto na bandeko, eleko oyo tozali kobika kati na yango sikawa.

¹²⁶ Sikawa, okoki koloba: “Tala, na—na—nasepelaka na Ndeko Neville ata moke te.” To: “Nasepelaka na Ndeko Jones ata moke te. Nalingaka Ndeko *Songolo-pakala* ata moke te,” ná makambo ya ndenge wana. Kasi soki kaka likambo moko ekómeli ye, ndeko, motema na yo etutami. Ekoki ata koboma yo mpenza.

Bomoni? Tokoki kozala na boboto mpo na bandeko mpe kozala na makanisi malamumu bamoko mpo na bamosusu. Bomoni? Kasi mpo na kobatela yango na etonga ya bato. . .

¹²⁷ Mpo na nini omitungisaka mpo na ndeko yango? Mpo okabolaki lipa elongo ná ye awa liboso na etumbelo, ndenge bokosala na mpokwa oyo. Ozalaki na boyokani na bandeko ná ye. Opesaki ye mbote ya loboko. Osámbelaka elongo ná ye. Azali ndeko na yo. Mpe akoki kosala likambo moko na nzoto, oyo osepeli na yango te, mpo omibendi mwa moke pembeni, (osengelaki kosala yango te), kasi okimi ye mwa moke. Kasi na nsé ya motema na yo, soki likambo moko ekómeli ndeko mobali yango, ekoki ata koboma yo, to ndeko mwasi yango.

¹²⁸ Na—nakómi mobange. Nazaláká elenge, kasi sikawa nakómi mobange. Nasilá komóná yango kosálema, na bileko. Nayóká bato koloba: “Nakolinga lisusu kozala na likambo moko ya kosala na ye te.” Mpe likambo moko ekómeli ndeko yango, ekoki ata koboma ye. Akobanda kokanisa: “E Nzambe, natikaki ete ndeko na ngai ya motuya ákende, kozánga kozongisa bondeko ná ye.” Bomoni? Bomoni? Bomoni? Ezali bolingo na bandeko. Emonanaka lokola ekokanga te, kasi ekangaka mpenza. Mafuta ya nzoi, ekangaka

¹²⁹ Sikawa, lokola mai yango eutaki kuna, kokita na ngomba, kino na nsé ya ngomba, sikawa, mai ya nkembo yango ezalaki kopumjwa-pumjwa likoló na ngomba, na mikelé mitano. Sikawa, mitano ezali motángo ya ngolu; Y-e-s-u, k-o-n-d-i-m-a, n-g-o-l-u. [na anglais: J-e-s-u-s, f-a-i-t-h, g-r-a-c-e.—Mok.] Bomoni? Mitano ezali motángo ya ngolu. Mikelé mitano ezalaki kosopana longwa na likolo awa, na mbeki yango, kino na nse *awa*.

¹³⁰ Bileko yango moko na moko ezalaki na libanga ya eyambweli yango. Basantu bazali kolala, kozela, kozela, kozela, kozela, bomoni, kino na eleko oyo. Kasi kala mingi te, Molimo Mosanto oyo ezali kosopana uta na Klisto ekoya mpe ekotia Lingomba elembo. Na nsima Lingomba ekonétolama. Ekokóma na bomoko mobimba mpenza ya Nzambe, Mwasi na libala mpo na Klisto, oyo akozala Mokonzi ya makambo nyonso. Bozali kolanda ngai sikawa? [Losambo balobi: “Amen.”—Mok.]

¹³¹ Sikawa, mwasi yango azalaki komituna. Sikawa, na ndoto na ye, azalaki komituna: “Mwa mokelé oyo. . . Mwa mokelé oyo ekokóma mpenza kino na nse?” Bomoni? Ekómaki kokauka. Sikawa, azalaki komituna bongo, ye moko. Sikawa, likambo oyo nalingi ete bósosola, yango oyo. Ye moko azalaki komituna na ntina na ye moko. Ye mpenza “azali na Molimo Mosanto”?

¹³² Sikawa, nakimaki koloba likambo oyo, eleki mwa mikolo, kokanisáká ete lingomba ekozala na molimo ya kokoka mpo na kosósola yango. Ntango mosusu ekozala malamumu ete nákata bande oyo sikawa, kasi, mpo nalingi te ete ékende katikati na

bandeko. Kasi okoki koloba minoko na sika, okoki kogánga, okoki kobina, okoki kobengana milimo mabe, kosala nyonso oyo olingi, kasi ata bongo ozali na Molimo Mosanto te.

¹³³ Bayekoli wana bazóngaki te, kosepeláka mpe kogángáka mpo milimo mabe ezalaki kotosa bango, kasi Yesu . . . katikati na bango Yudasi azalaki, boye te?

¹³⁴ Yesu alobaki: “Na mokolo wana,” ntango Akoya, ete, “mingi bakoya epai na Ngai mpe bakoloba: ‘Nkolo, nabenganaki milimo mabe, mpe na Nkombo na Yo, nasalaki misala na nguya, boye te?’ Mpe Nakoloba: ‘Bólongwa pene na Ngai, bino basali masumu na nko. Nayebaki bino te.’” Makambo yango ezali bitaliseli ya Molimo Mosanto te.

“Bokoyeba bango na mbuma na bango.”

¹³⁵ Sikawa, bokoloba: “Ndeko Branham, biso, tosengeli koloba minoko na sika?” Na ntembe te. Ezali makabo ya Nzambe. Kasi makabo yango ya Nzambe, soki ezangi banguya oyo kati na yango, ekómaka libanga ya libaku mpo na mozangi kondima. Nzambe andimaka yango te.

¹³⁶ *Oyo* nde esengeli kozala liboso. Mpe ntango ozali na kondima, nguya, boyébi, komipekisa, motema molai, bosantu, mpe bolingo na bandeko, bongo Molimo Mosanto akokita mpe akotia yo elembo lokola moto moko, kaka ndenge Akangaka bileko ya lingomba lokola eloko moko. Lolenge oyo Asalaka na Mwasi na Ye ya libala ezali lolenge oyo Asalaka na moto na Ye moko na moko; basálemaka na bisalelo yango moko, ndenge Eva asálemaki uta na Adama, na mokuwa ya mopanzi na ye. *Oyo* nde makambo oyo bosengeli kozala na yango liboso. Bokoki komekola yango te. Bokoki komekola yango te. Esengeli kotindama na Nzambe mpe kobotama na Nzambe. Komekola ekotisaka kaka mobúlungano.

¹³⁷ Ezali ndenge nalobaki. Okoki kobanza ete ozali komona kokómbelé afandi kuna ná nsala ya ebengá amibambi na mapapu na ye, mpe koloba: “Bomoni, nazali ebenga!” Azali ebengá te. Azali nde kokómbelé, engondó. Okoki kobanza eyángángá ná nsala ya ndeke oyo paon na mapapu na ye, mpe koloba: “Bomoni!”? Wana ezali eloko oyo abambi kobamba.

¹³⁸ Kasi esengeli kouta na kati mpo na kobima libanda, mpe ebotaka Boklisto; Nzambe, na nguya ya Molimo Mosanto!

¹³⁹ Ndeko na biso ya mwasi, makolo na ye epoláki mai ntango akómaki na nse. Bisó nyonso toyebi ete Ndeko mwasi Shepherd azalaka na bolingo mingi. Ndako na ye ezalaka polele. Ye ná ndeko mobali, ézala shége, ézala mosengi-sengi, ézala nani, bakoleisa ye, bakosala nyonso oyo bakoki kosala mpo na kosunga ye. Oh! Nzambe andimaki yango, mobóko na ye.

¹⁴⁰ Oyo nde, sikawa, bósosola liteya oyo. Oyo nde eloko ya mabe na—na . . . Oyo nakotia yango na bande. Oyo nde eloko

etambolaka malamu te na Branham Tabernacle. Bomoni, ezali na ndenge mibale ya kondima. Ezalaka na ndenge mibale ya nguya, lokola nalobaki yango mokolo wana. Ndenge mibale ya boyebi. Ndenge mibale ekeseni ya komipekisa.

¹⁴¹ Moto akanisaka ete azuaka yango na bokili. Wana ezali te lolenge ya komipekisa oyo Nzambe azali kolobela. Ezali nde nkanda ya mabe wana, oyo okokaka komipekisa te, ná makambo ya ndenge wana, ete ózongisa mbala moko mpe óbanda koswána.

¹⁴² Motema molai, ná nyonso wana, ezali na oyo ya litió, oyo ya maloba kaka; kondima epesami na bozalisi; nguya epesami na bozalisi. Ezali na komipekisa oyo epesami na bozalisi. Makambo nyonso oyo epesamaka na bozalisi.

¹⁴³ Mpe eteni monene mpenza ya kondima na biso ezali kondima ya bongó. Na koyókáká Liloba, ememaka biso na koyeba Nzambe na bongó.

¹⁴⁴ Kasi soki Oyo euti na Likoló, oh, ndeko, soki Etikali mpenza kobeta *oyo*, ekozala na kondima moko ya molimo, ya búlee. Na ntango wana kondima yango esalaka nini? Kondima yango eyebaka kaka Liloba. Ata soko eloko mosusu elobi nini, yango eyebaka bobele Liloba, mpo: “Na ebandeli Liloba azalaki, mpe Liloba azalaki elongo na Nzambe, mpe Liloba azalaki Nzambe.” Mpe Liloba ezali Nzambe kino lelo. “Mpe Liloba akómaki mosuni mpe afandaki katikati na biso.” Mpe ntango Liloba Yango moko ezali kosopana na kati ya kondima na biso, kondima na biso ya bongó ekómaka emoniseli ya molimo.

¹⁴⁵ “Mpe likolo na mobóko yango, Nakotonga Lingomba na Ngai.” Bomoni? Likoló na likanisi ya bongó ya kokota na lingomba te, likanisi ya bongó mpo na Yango; kasi likoló na emoniseli, ntango mikelé ya ngolu wana esopani na kati ya kondima ya bongó oyo ozali na yango. Na bongo, likoló na yango, emoniseli ya molimo, “Nakotonga Lingomba na Ngai, mpe bikuke na ewelo ekoki kolóna Yango te.” Bomoni? Elakisi ekotelemela Yango, kasi ekolonga ata moke te. Oh, oyo likambo ya nkembo mpenza! Sikawa bomoni kondima. Mikelé mitano yango. . .

Nazalaki na ekomeli ya etánda awa, kasi nabanzi atikálá koamema yango awa te.

¹⁴⁶ Kasi mikelé mitano oyo bozali komona kokita awa, esangisaka nyonso *oyo* makasi. Molimo Mosanto nde esálaki lingomba ya Efese. Molimo Mosanto nde ebótaki lingomba ya Sumuluna. Molimo Mosanto nde esálaki lingomba ya Pelegamo, mpe lingomba ya Tuatila, na Bileko ya Molili. Molimo Mosanto nde esili kotonga Mwasi na libala wana, Moponami oyo asili kobima na mimesano nyonso ya bibongiseli kati na bileko nyonso, ndenge wana. Ezali na Moponami moko, Mwasi na libala ya Yesu Klisto, oyo abongisámá liboso, oyo Molimo Mosanto asili kobenga libanda Moponami. Mpe ezalaki Molimo Mosanto na

eleko *oyo*, na eleko *wana*, na eleko *wana*, *wana*, *wana*, *wana*, *wana*, kino na likoló, Molimo Mosanto.

147 Sikawa mpo na moto na moto, banguya oyo ná nyonso wana, boyébi mpe komipekisa, ebakisamaka na kondima na biso. Na nsima, ntango Libanga ya motó eyei, Molimo Mosanto esangisaka Yango makasi esika moko. Wana nde libatisi ya Molimo Mosanto. Yango wana ezalaka lisusu mingi te lelo.

148 Nátala naino awa, nakomaki makambo mosusu awa. Tótala naino. Nayemáki eloko moko awa, mpo na ndoto na ye. Bomoni? Bokoki komona yango te longwa kuna.

149 Sikawa, oyo eutaka na Molimo Mosanto, eloko nini eyaka? Na nsima, Akopesa yo kondima ya koleka mayele, kondima ya molimo, oyo ezalaka *awa* na nsé. Na bongo, kondima ya molimo wana eyebaka kaka Liloba. Ata moto mosusu alobi nini, ezali—ezali na ntina moko te. Eyebaka kaka Liloba. Soki moto moko alobi: “Ntango na bikamwa esílá koleka.” Kondima wana eyébaka kaka Liloba. Soki moto moko alobi: “Libatisi ya Molimo Mosanto ezalaka te.” Kondima wana eyebaka kaka Liloba. Wana nde kondima ya solosolo, ya molimo, bomoni. Ya solo. Bomoni? Eyebaka bobele Liloba.

150 Na nsima, oyo wana ezalaki ya liboso. Ya liboso, oyo eyaka epai na yo, kondima na yo ya bongó oyo awa, ezali Molimo Mosanto kokita koingela na kondima ya bongó na yo, kokómisáká yango kondima ya molimo. Na bongo kondima ya molimo eyebaka bobele Liloba.

151 Sikawa, mpe ya mibale, ya misato. Na bongo okozua ya molimo, okozua Molimo Mosanto, mpe ekotia elembo na makambo nyonso *oyo* na kati na yo, wana Molimo Mosanto ezipi eloko *oyo*. Uta na kondima na yo, komata kino na Molimo Mosanto, ekotia yo elembo na kati elongo ná Klisto. Na bongo bokómi Moko. Amen. (Longola ngai eloko oyo; ezalaka na bozito na maboko.) Bokómi moko. Bomoni, yo ná Klisto bokómi kobika elongo. “Na mokolo yango bokoyeba ete Ngai nazali kati na Tata, Tata kati na Ngai; Ngai kati na bino, mpe bino kati na Ngai.” Bomoni? Na ntango wana ekómi eboke oyo etiami elembo na Nkolo Nzambe.

152 Sikawa, na ntango wana bandimami mpe batiami na esika. Ntango ngonga yango ekoki, bakómaka baoyo bandimami, bana na Nzambe, ya mibali mpe ya basi.

153 Bómikanisela, na Buku ya Matai, mokapo ya 17, molongo ya 1 kino ya 5, Yesu likoló na Ngomba ya Mbongwana?

154 Bosílá koyoka *Bóyóka Ye*. Liteya oyo nauti koteya awa, eleki pene na mobu moko, oyo eyebani mingi, *Bóyóka Ye*. Kopesama esika ya mwana, na Baefese 1:5 mpe: “Nzambe abongisaki biso liboso mpo tózua lokumu ya bana.”

155 Bomoni, na libota, ntango mwana abotami kati na yango, azali mwana na ntango yango. Kasi mwana yango azalaki na bayangeli mpo na kobókola ye. Mpe soki mwana yango akómaki na ye te kozala mwana ya—ya malamumu, akokaki ata moke te kokóma mosangoli. Kasi soki azalaki mwana ya malamumu, mwana oyo atósaka tata na ye, na bongo mwana yango azalaki kopésama lokumu ya mwana, to kotiáma na esika ye. Akómaki mosangoli ya biloko ya tata na ye.

156 Mpe yango nde Nzambe azalaki kosala na Ngomba ya Mbongwana. Ntango Amemaki Mwana na Ye Moko, nsima na Ye kondimisama lokola Mwana ya malamumu, bomoni, mpe koyika mpiko na masenginia nyonso, Amemaki Ye likoló na Ngomba ya Mbongwana mpe Azipaki Ye na elilingi.

157 Boyebi, na Kondimana na Kala, bazalaki kozua mwana, kolatisa ye elamba ya kitoko mingi mpenza, mpe bazalaki kotalisa ye liboso na bato. Mpe bazalaki kosala molulu ya kotiáma na esika, to biso tobéngaka yango kotiama lokumu ya mwana. Kuna na Bagalatia, nakanisi mpenza ete Polo abengi yango kotiama lokumu na bana. Sikawa, kasi, kotiama ya mwana, batei ná bato na molimo oyo batángaka Biblia bakososola likambo ya kotiama ya mwana na esika. Na elobeli mosusu, mwana yango azalaki mwana ntango abótamaki.

158 Wana nde esika ba-Pantekotiste na biso basáláki libunga. Kobótama na libota, na nzela ya Molimo Mosanto, ezali solo, kasi na nsima tosengeli kozala lolenge ya malamumu ya bana, oyo bayángelami na Moyángeli ya malamumu. Bomoni?

159 Sikawa, na ntango ya kala, soki moto akanisaki mpo na mwana na ye, mpe alingaki ete ázala mwana ya malamumu, azalaki kozua moyangeli ya malamumu koleka oyo akokaki komona, molakisi ya malamumu koleka, mpo alingaki ete mwana na ye ákóla mpo na kokóma lokola papa na ye. Bomoni? Boye azalaki kozua moyangeli ya malamumu.

160 Sikawa, soki moto na mokili akanisaka kozua moyangeli ya malamumu koleka, boni boni mpo na Nzambe, Tata na biso? Sikawa, Azuaki ata moke te ba-epísikópo, ná ba-cardinale, ná basángó. Azuaki Molimo Mosanto mpo na kozala Moyangeli na biso. Mpe Molimo Mosanto azali Molakisi na biso. Mpe A—Azalaka na kati ya Lingomba, mpe Amemaka nsango epai ya Tata.

161 Bongo soki tata, to, moyangeli yango ayei koloba: “Ee, Tata. . .” Sikawa, akokende te kozua moyangeli moko boye, oyo alingaka lokumu, boyebi, minene, ndenge tobéngaka yango. Akoloba: “Oh, soki nayebisi tata likambo moko na ntina na. . . Mwana yango azali na ye motomboki mpenza, kasi soki na—soki nayebisi yango na tata, tata akoki kobakisela ngai lifuti.” Oyo wana azali moyangeli ya ndenge ya malamumu te. Moyangeli ya ndenge ya malamumu azalaka na bosembo, alobaka solo.

162 Mpe Molimo Mosanto alobaka Solo ntango Ayaka liboso na Nzambe, mpo na biso. Iyo. Boye, Ayaka wana. Bomoni ndenge nini? Lelo, Alingaki koyoka nsóni mpo na koloba: “Bana na Yo nyonso ya basi bakómi kokata suki na bango, nzokande Opekisaki bango kosala bongo. Bana na Yo ya mibali bakómi kolanda mingi bibongiseli ya bato, bakokaka na bango koyíkana mpiko te. Ezali solo. Mpe bakómi kondima likambo *oyo* na esika ya Oyo, mpe eloko *oyo* na esika ya oyo Wana.” Ndenge esalaka Ye nkanda! Kasi ndenge mpenza Moyangeli yango akolinga koya koloba: “Oh, la la! Mwana yango azali mwana ya solosolo. Azali mpenza lokola Tata na ye.” Oh, Akolinga mpenza koloba bongo! Bomoni?

Na bongo Tata akovimba na litundú, koloba: “Oyo nde mwana na Ngai!”

163 Yango mpenza nde likambo oyo Nzambe asalaki na Ngomba ya Mbongwana. Bótala, Mose ná Eliya bamónanaki wana. Mpe Petelo, amemamáki na nsai nyonso; ekamwiseli eutaki kosalema. Petelo amemamáki, alobaki: “Tótonga mingombo misato, moko mpo na Yo, moko mpo na Mose, mpe moko mpo na Eliya.”

164 Wana azalaki naino koloba, Nzambe akátaki ye maloba. Alobaki: “Oyo azali Mwana na Ngai na bolingo oyo Nasepeli mpenza na Ye. Bóyoka Ye.” Bomoni? Nzambe amízóngisaki nsima mpe alobaki: “Oyo azali Mwana na Ngai.”

165 Mose azalaki kotalisa mobeko. Basakoli bazalaki kotalisa boyengebene na Ye. Bisó tokoki kobika na nzela na mobeko na Ye te. Tokoki kobika na nzela na boyengebene na Ye te. Ngai naséngaka boyengebene te. Nalingaka nde mawa, kasi boyengebene te. Nakoki kotósa mobeko na Ye te, mpe nakoki kokokisa boyengebene Ye te. Kasi nazali na bosenga ya mawa na Ye. Mpe Nzambe alobaki ete mobeko mpe boyengebene ekokisamaki na kati na Ye. “Azali Mwana na Ngai na bolingo. Bóyoka Ye. Ezali Ye. Oyo wana ezali Ye.”

166 Sikawa, na Kondimana na Kala ntango mwana yango apesamaki lokumu ya mwana, to atiamaki na kati ya libota, nkombo na ye na chèque ezalaki na motuya mpenza lokola oyo ya papa na ye. Iyo, misie. Bazalaki te na . . . Bazalaki na lopéte moko, na eleko wana, e—elembo, elembeteli. Mpe bazalaki . . . [Ndeko Branham asali makeléle ya moto oyo abwaki nsoi mpe abeti eteyelo—Mok.] Abwakeli yango nsoi, atii yango, ezalaki elembeteli. Ezalaki mpenza lokola . . . akómaki kolata lopété ya papa na ye, elembeteli na ye. Mpe ezalaki mpenza na motuya lokola oyo ya papa na ye.

167 Sikawa, lokola Yesu azalaki na botosi, Yesu epai na Nzambe, Nzambe atiaki Ye na esika yango mpenza: “Oyo ezali Ye.”

168 Sikawa, ntango moto abótami na Molimo Mosanto na kati ya libota na Nzambe mpe atalisi polele ete azali na banguya yango kati na ye, ete Nzambe akoki komona nguya, boyébi,

komipekisa, motema molai, boboto na bandeko, ná bosantu, na kati na ye, bongo nde Nzambe akotia ye elemba, to akotia ye na esika yango. Mpe, kuna, ezali na ntango yango nde bomonaka bana na Nzambe ya mibali mpe ya basi.

¹⁶⁹ Na bongo, Baefese 4:30 elobi: “Bóyokisa Molimo Mosanto ya Nzambe mawa te, na yango, botiami elemba kino na Mokolo ya lisiko na bino.” Sikawa, bamosusu kati na bino, ba-Batiste oyo balingaka kotalisa kobatelama ya Seko, sikawa, soki bokómi na etape wana, nakozua ngámbo na bino na oyo etali kobatelama ya Seko, soki bokómi na esika wana.

¹⁷⁰ Kasi koloba kaka, soki moto alobi: “Nakoti na lingomba Batiste. Nazali Presbiterien. Nazali na kobatelama ya Seko.” Ezali lokuta. Bomoí na yo moko ezali kotalisa ete ozali na Yango te, kino Oyo ézala kuna.

¹⁷¹ Soki Nzambe apesi yo lokumu ya mwana mpe atii yo elemba na Molimo Mosanto na kati ya Bokonzi na Ye, na bongo okoki lisusu kobima kuna te. Osili kozua kobatelama ya Seko. Ndima. “Bóyokisa Molimo Mosanto ya Nzambe mawa te, na nzela na yango bino ná banguya na bino nyonso ya bonzambe botiámi elemba kino na Mokolo ya lisiko.”

¹⁷² Nandimaka ete ezali na Mwasi na libala oyo abongisámá liboso. Nandimaka ete Nzambe alobaki ete Akozala na “Lingomba oyo ezáangi litónó to nzoloko.” Nandimaka na kobongisama liboso, ete Mwasi na libala abongisámá liboso. Na ntembe te Akozala Kuna. Nazali kolikia ete nakozala Kuna elongo ná Ye. Yango mpenza, bomoni, nakozala elongo ná Ye. Sikawa ngai nde nasengeli kosala mpo na lobiko na ngai moko elongo ná Nzambe, kino makambo *oyo* éndimama na Nzambe, na nsima étiana elemba kati na Bokonzi na Nzambe. Wana nde Molimo Mosanto. Wana nde misala ya solosolo ya Nzambe. “Etiami elemba kino na Mokolo ya lisiko.”

Yango nde ezalaki ndoto na ye. Namilobelaki ete ezalaki kitoko.

¹⁷³ Sikawa, na yango, ntango Akosala bongo, ntango Lingomba yango ekokóma na esika oyo, to moto na moto nde, Lingomba ekozala Kuna. Bótika ete náloba yango malamú mpenza mpo bósosola yango. Lingomba ebongisámá liboso mpo na kozala Kuna. Nalingi kozala elongo na Yango, kasi nzela bobele moko mpo názala elongo ná Yango, ezali kozala eteni na Yango. Ndenge nini nakokóma eteni na Yango? Na kozaláká na kati na Yango. Ndenge nini nakokóta kati na Yango? Na nzela ya libatisi, na nzela ya Molimo moko. Bakolinti ya Liboso 12: “Na nzela ya Molimo moko, biso nyonso tobatisami na kati na Nzoto moko.” Nzoto moko; kobátisama na kati na Yango.

¹⁷⁴ Kasi okoki komísálela mwa makambo yango te, koloba: “Nalobaki minoko na sika. Nazali na Yango.” Okei kuna, osiliki, obandi koloba mabe, mpe kosala bisalélá. Bomoni? Oyo wana

ezali kokotisa nsálá ya ndeke oyo paon na nzoto ya—ya ndeke oyo geai. Bomoni? Okoki kosala bongo te. Bomoï na yo moko ezali kotalisa polele ete ezali yango te.

¹⁷⁵ Kasi ntango makambo oyo ezali kosala kati na yo, soki Nzambe nde ezali kosala yango, na bongo otiami elembo. Na bongo ezali makambo oyo moto amikotisi na nzoto te. Ozali bobele yo moko. Na ntango yango nde bimononeli, oyo ebongi be, Molimo Mosanto, misala ya Nzambe, makambo nyonso, etalisami polele, mpo (mpo na nini?) yo ná Klisto bokómi eloko moko. Nazali kolikia ete bozali kososola. Yo ná Klisto bokómi eloko moko.

¹⁷⁶ Nakomáki likambo mosusu awa, oyo nakanisaki ete nálobela yango. Ememaka biso na esika Bomoï ezali. Na bongo okómi. . . ozali na Bomoï na Seko.

¹⁷⁷ Sikawa, nazali na lexique ya Greki awa, *The Emphatic Diaglott*. Nayekolaki liloba moko mokolo mosusu.

¹⁷⁸ Sikawa, na Yoane 14, to Yoane 3:16, tomoni, esika moko elobi ete, “kozala na Bomoï *eumelaka libela*.” Na esika mosusu elobi, “kozala na Bomoï na *Seko*.” Kasi na ki-Greki, na ndimbola ya ki-Greki. . . Na ki-Ebele, elobi: “Bomoï ezángi nsuka.” Na liloba ya ki-Greki, ezalaka a-i-n-i-o-a-n.

¹⁷⁹ Ezali lokola “*aeon*.” *Aeon* ezali “ntáká ya ntango” oyo ekoki kozala te, ezali motángó oyo ekoki kotángama te. Ezali koleka ba-milió, ba-milió ya ba-milió, ba-kiásá.

¹⁸⁰ Kasi awa ezali *aionios* ya ntango, Bomoï na Seko. Mpe liloba ya Anglais mpo na yango ezali Seko. Toyebi yango lokola Seko, *aionios*, to “Bomoï oyo ezangi nsuka.” Bomoni? Mpe soki ozali na Bomoï oyo ezangi nsuka, ndenge nini okoki kokufa? Okómi eteni ya Seko. Mpe eloko ya Seko ezalaka bobele moko.

¹⁸¹ Satana azali Seko te. Te. A—akómaki Satana. Lifelo ezali Seko te. Lifelo ekelámaki. Ezali Seko te. Mpe banzoto oyo ezali Seko te. Ekelámaki.

¹⁸² Kasi Molimo na Nzambe ezali Seko. Etikálá kobanda te, to Ekotikáláká kozala na nsuka te. Mpe nzela bobele moko tókoki kozala na Bomoï na Seko, uta na liloba ya Greki wana, *Zoe*, oyo elingi koloba “Bomoï mpenza ya Nzambe,” ezali tózua, tókóma eteni ya Nzambe ntango tokómi bana mibali mpe bana basi ya Nzambe, mpe tozui Bomoï *aionios*. Boye, eteni oyo ezali na bomoi, biso, oyo esósoli Liloba oyo, kobanda *awa* kino *kuna*, oyo esósoli, ezali Bomoï *aionios*, “Bomoï oyo ezangi nsuka.” Ezali Bomoï Mpenza ya Nzambe kati na biso. Amen. Fiuu!

¹⁸³ Mokolo wana, nazalaki na mobembo, nazalaki kosolola ná Témoins de Jéhovah moko. Sikawa, ezali te mpo na kozanga limemia na kondima ya moto moko. Tozali na bango mingi oyo babongwáná mpe bafandi awa, oyo bazalaki ba-Témoins de Jéhovah. Moko na bayangeli misolo ya losambo na biso azalaki

Témoin de Jéhovah, *azalaki*, mpe abikisamaki, ye ná libota na ye. Tata na ye azalaki motángi; Ndeko Wood ná bamosusu. Bandeko na ye nyonso ya mibali mpe ya basi, pene na bango nyonso basili koya, bazui Molimo Mosanto, mpo bimononeli ya Nzambe eyebisaki bango makambo oyo basáláki. Mpe oyo bango. . . Bomoni? Yango nde esáláki yango.

¹⁸⁴ Sikawa, kasi awa, na buku ya ba-Témoin de Jéhovah, elobami ete péma oyo bopemaka ezali elimo. Sikawa, ekoki kozala bongo te. Péma oyo bopemaka ezali elimo te. Soki ezali bongo, na ntango moko boye olingaki—olingaki kozala elimo moko boye, na mbala ya nsima okómi moto mosusu, mpo opémaki elimo wana. Bótala epai elingaki komema yo. Sikawa, péma ezali mopepe, mpe mopepe ezali oyo opémaka na zóló na yo.

¹⁸⁵ Sikawa, bazuaka Likomi oyo elobaka: “Mpe Nzambe apémaki Péma na zóló na ye, mpe akómaki elimo na bomoi.” Sikawa, nalingi kotuna bino likambo moko. Soki azalaki moto, azalaki kopéma péma ya ndenge nini liboso Nzambe apéma Péma na Ye ya Bomoi na kati na ye? Bomoni? Péma ya ndenge nini? Azalaki moto na bomoi oyo azalaki kopéma. Ee, lisusu, soki ezali bongo, na bongo nyama nyonso ezali elimo ya bomoi, mpo bapémaka elimo ya moto, mpe elimo na biso, ná nyonso wana. Boye, Yesu alingaki kozala na ntina ya kokufa te. Mbeka ya nyama elingaki kokoka na yango. Bomoni? Boye, ndeko, likanisi yango esimbi na yango te.

¹⁸⁶ Kasi oyo Nzambe asalaki ezali ete, Apémaki Péma ya Bomoi na Seko, amen, na ntango wana moto akómaki elimo na bomoi, elimo oyo ekoki kokufa te. Sikawa, botala sikawa. Tokokóta na kati ya mafuta ya nzoi, kino na katikati ya maboko. Bótala. “Apémaki Péma ya Bomoi na Seko na zóló na ye, mpe ye akomaki elimo na Seko.” Mpamba te, Nzambe apémaki, ezali te oyo bozalisi esalaki, kasi oyo Nzambe asalaki, apemaki Péma ya Bomoi na zóló na ye, mpe akómaki elimo na bomoi.

Na bongo, okoloba na ngai: “Adama akufaki, Ndeko Branham.”

¹⁸⁷ Kasi bomikanisela, liboso Adama ákufa, azalaki na mwana-mpate moko oyo asikolaki ye. Aleluya! “Baoyo Ayebaki liboso, Abengaki bango.” Azalaki na mwana-mpate moko mpo na kosikola bango. Azalaki elilingi. Adama akweyaki. Na bongo mwana-mpate apesamaki mpo na Adama, mpo asilaki kozua, na zóló na ye, Péma ya Nzambe ya Seko, mpe asilaki kokóma elimo ya bomoi. Azalaki mwana na Nzambe.

¹⁸⁸ Péma na ye te, lokola liloba ya Afrika. Nayebi te soki liloba yango ezali nini na ki-Greke, sikawa. Kasi na Afrika basalelaka liloba oyo, *amoyah*, elingi koloba “mopepe; nguya oyo emonanaka te”. Ba-nyama bapémaka amoyah. Basúmuki bapémaka amoyah.

189 Na bongo, mpo na nini tobundaka mpo na Bomoi na Seko, soki elimo ya Seko ekotaka kati na biso ntango topemaka? Mpo na nini kobunda mpo na Bomoi na Seko? Mótó yango ezongeli yo, ndeko. Bomoni? E—e—ekoki kosalema te.

190 Kasi, Nzambe, koleka mingi na Adama, apemaki Péma ya Bomoi na Seko, mpe akómaki moto ya Seko elongo ná Nzambe. Azalaki na nguya lokola Nzambe. Azalaki nzambe ya moke. Azalaki nzambe ya mabelé; kasi Nzambe ya Likoló te, sikawa. Nzambe ya mabelé!

191 Mokolo moko bana na Nzambe bakókóma lisusu banzambe. Yesu alobaki bongo. “Ekomami te na mobeko na bino ete: ‘Bozali banzambe’? Na bongo soki baoyo Abengaki bokoki kobenga bango banzambe, baoyo Nzambe ayaki epai na bango, ndenge nini bokoki kokweisa Ngai, koloba, ntango Nalobi Nazali Mwana na Nzambe?” Bomoni? Sikawa tobandi kokóta na eloko moko ya bozindo. Sikawa botala likambo oyo, wana tozali kobeta nsété.

192 Sikawa, bango oyo. Akómi sikawa mwana na Nzambe, kasi asalaka mabunga. Ayebi ete azosala mabe. Sikawa bómikanisela, Adama apengwisamaki te. Biblia elobi bongo. Timote ya Liboso 3. “Adama apengwisamaki te, kasi mwasi apengwisamaki, abukaki mobeko.” Adama atámbolaki na Eva, mpo azalaki mwasi na ye.

193 Ndenge moko mpe Klisto, apengwisamaki na Satana te, kasi akendeki kino na kufa elongo ná Mwasi na libala. Akendaki ázala na Mwasi na libala, mpo Ákoka kosikola Lingomba.

194 Adama ayébaki ete azalaki na libunga, boye abimaki elongo ná Eva. Bomoni? Kasi mwana-mpate moko asilaki kopesama mpo na bango, mpo básíkolama.

195 Mpe bana-mpate yango, lelo, oyo Nzambe ayebaki bango liboso, ná baoyo Nzambe asili kobena, Mosikoli moko azali. “Moto moko te akoki koya epai na Ngai soki Tata na Ngai abendi ye te. Mpe baoyo nyonso Tata asili kopesa Ngai bakoya epai na Ngai.” Ya solo? Boye Mwana-mpate moko apesami, uta kozalisama ya mokili, epai wapi bankómbó na bango ekomamáki na Buku ya Bomoi ya Mwana-mpate. Mwana-mpate moko asilaki kopesama, mpo na kofungola nzela ya ngolu mpo moko na moko na bango ákota na lisekwa, Mwana-mpate moko asilaki kopesama; Mwana-mpate ya Adama, sikawa bótala, mwana-mpate moko mpe asilaki kopesama mpo na Adama.

196 Sikawa, oyo wana nde Lingomba lelo. Nalingi koloba te li—lingomba. Boyebi?

197 Nazali koloba yango te mpo na kotúka, mpe nazali koloba yango te mpo na kosala moto moko mpasi na motema. Nazali awa te mpo na kosala bongo, ndenge nasilaki kolimbola yango. Nazali awa mpo na kosunga, kasi oyo nazomeka kosala. . .

¹⁹⁸ Boyebi nini? Na bosolo mpenza, mangomba oyo ezali mangomba te. Lingomba ezalaka bobele moko. Baoyo ezali ba-loge. Bomoni? Bazali ba-loge. Nazali na eloko moko te. . . Ezali mabe te. Kasi na—nalingi kotalisa bino yango polele, na miníti moke, ete ezali mpenza ba-loge. Bazali bato ya loge Metodiste, bato ya loge Presbiterien, to bato ya loge Pantekotiste, ná oyo etali yango. Iyo, um-hum. Ba-loge! Bomoni? Bokoki te. . . Bomoni? Mangomba ezali mpenza ba-loge, epai bato oyo bakanisaka ndenge moko basanganaka.

¹⁹⁹ Kasi Lingomba ezalaka Moko. Mpe na Lingomba bakotaka te. Babótamaka kati na Yango. Mpe soki obótami kati na Yango, okómi enama na Yango.

²⁰⁰ Kaka lokola libota na ngai. Nazali kati na libota Branham eleki mibu ntuku mitano na misato. Baséngaki na ngai ata moke te ete nákota na libota yango. Mpo na nini? Nazali na ntina ya kokóta na libota yango te. Nabótámá Branham.

²⁰¹ Mpe na Lingomba babótamaka. Sikawa, nyonso mosusu ezali ba-loge. Botikálá kokanisa na ntina na yango? Iyo, misie.

²⁰² Mokolo moko nazalaki kokáta matiti, mpe nazalaki kokanisa, ee: “Lingomba Katoliko monene mpe mosanto,” ndenge babengaka yango. Nakobaki kokanisa bongo, kokatáká matiti.

²⁰³ Mpe Eloko moko etélémisaki ngai na mpwasa mpe elobaki: “Kobenga yango Wana te.” Natálaki zinga-zinga. Nakobaki kokata matiti. Etélémisaki ngai lisusu mpe elobaki: “Kobenga bango Wana te.” Elobaki: “Bazali loge, lokola bamosusu. Bazali Lingomba te. Lingomba ezalaka moko.” Bomoni? Bazali bato ya loge, mpo bokoki kokóta na loge. Kasi na Lingomba bokoki kokóta te. Lingomba, babotamaka kati na Yango. Bakómaka enama na Yango na nzela na Mbotama ya sika, nde okómi enama ya Libota, ndeko mobali to ndeko mwasi kati na Yango.

²⁰⁴ Sikawa bótika nátángela bino likambo moko na *The Emphatic Diaglott* awa, likambo moko, na ntina na Emoniseli 17:3, na ntina na Minyoko ya *The Emphatic Diaglott* oyo. Botala malamau ndenge elobami, mpe ndenge—ndenge ekokani ná yango na kitoko nyonso. Emoniseli 16:17. Malamau. Sikawa tótánga naino awa. Bóyoka yango, na bokebi mpenza, Emoniseli 17:3.

Moko na Banje YANGO NSAMBO, *baoyo bazalaki na Mbeki*. . . NSAMBO, *ayei kosolola na ngai ete*, . . .

²⁰⁵ Nazali kotángela bino yango, uta na *Lexique*. “Bazalaki na. . .”

. . . “Yaka, nakotalisa yo EKATELI EKATAMELI MWASI
MONENE NA PITÉ, oyo afandi likoló na *Mai Mingi*;

²⁰⁶ Mpe biso nyonso toyebi ete ezali Vatican. Awa tozali na *Mopaya Na Biso Ya Lomingo*, ya lingomba Katoliko, elobi na biso ete ezali mpenza bongo. Bomoni?

207 Mpe lokola eyano na yango, alobaki: “Kasi zela naino.” Alobaki: “bankómbó ezali ya ndenge na ndenge,” alobaki, “oyo ekopesa nkama motoba na ntuku motoba na motoba.”

Nalobaki: “Kasi zela naino.”

Alobaki: “Nkombo na yo ekoki kopesa nkama motoba . . .”

208 “Kasi,” nalobaki, “ngai nafandi likoló na ngomba nsambo te, mpe nazali koyangela mokili te, omoni.” Ah-ha! Bomoni? Ya solo. Bomoni?

209 [Frère Branham atáangi Emoniseli 17:1 na *The Emphatic Diaglott—Mok.*]

. . . *talisa yo EKATELI EKATAMELI MWASI MONENE NA PITÉ,*
oyo afandi likolo na *Mai Mingi*;

210 *Mai*, Emoniseli 17:15, ezali “boike ná bibelé na bato.” Bomoni?

oyo BAKONZI na MOKILI basili basali ná ye ba-pité, mpe BAFÁNDI na MOKILI balángwi VINYO ya . . . NA PITÉ NA YE.

211 Sikawa nini?

Akambi ngai kati na Molimo kuna na Lisobe; . . .

212 *The Diaglott Emphatitt* sikawa. Bomoni?

. . . *namoni Mwasi afandi likolo na Nyama ya lángi ya motane, oyo atondi na Nkómbó na kotúka, . . .*

213 Sikawa, na King James, elobi: “etondi na bankómbó ya kotúka.” Bozela naino, mpe nakokóma na yango awa, bozela naino. Emoniseli, ya 3. Malamu, yango oyo. Malamu. Emoniseli, nalingaki koloba 17, ezali 7 te; 17, sikawa bóyoka molongo ya 3.

Mpe akambi ngai kati na molimo kuna na lisobe: namoni mwasi afandi likolo na nyama ya lángi ya motane, atondi na nkómbó na botúki, . . .

214 Elobami nde bongo na Anglais. Kasi ki-Greki ya ebandeli ya *The Diaglott* elobi yango boye, na Emoniseli 17:3. Bóyoka.

Akambi ngai kati na Molimo kuna na Biliki; mpe namoni Mwasi moko afandi likoló na Nyama—Nyama ya lángi ya motane, atondi na Nkómbó na Kotúka, . . .

215 Bokeseni ezali monene kati na “bankómbó ya botúki” na “bankómbó ya kotúka.” Ezali eloko nini? Mpe biso . . . Sikawa, mwasi yango azalaki:

. . . *MAMA YA BASI YA NDUMBA . . .*

216 Bisu nyonso toyebi yango. Kasi ezali nini? [Ndeko moko alobi: “Lingomba Katoliko ya Roma.”—Mok.] Ozali na ntina te ya kozala . . . Ee, ya solo, lingomba Katoliko ya Roma ezali na kati. Kasi “atondi na bankómbó ya kotúka,” ba-Methodiste, ba-Batiste, ba-Presbiterien, ba-Lutherien, bango nyonso bamibengaka “mangomba ya Nzambe.” Bankómbó ya kotúka! Bokeseni ezali monene kati na “bankómbó ya botúki”

mpe “bankómbó ya kotúka”. Bamibengaka “Lingomba ya Nzambe,” mpe bamitalisaka bongo liboso na mokili; babétaka masano ya káláti, komeláká masanga, mpe kosaláká bisálá-sala, baféti ya mpokwa mpo na komela súpu, mpe nyonso wana, ná makambo nyonso ya ndenge na ndenge basálaka.

²¹⁷ Lingomba ezali bobele moko. Babotamaka kati na Yango. Bakótaka Kuna te soki osukolami na Makila ya Mwana-mpate te, mpe soki otiami elembo na Molimo Mosanto te.

²¹⁸ Bokeseni ezali monene kati na “bankómbó ya botúki” mpe “bankómbó ya kotúka.” Bosósoli yango? [Losambo balobi: “Amen.”—Mok.]

²¹⁹ Nasósolaki yango na ntongo ya lelo, ntango nazalaki kotánga awa, na . . . Ntango nazalaki koya awa, Eloko moko elobaki na ngai: “Kóta na biró na yo. Zua *The Diaglott*.”

²²⁰ Ee, ezali bobele botosi. Esili. Nakotaki. Mpe nazuaki Emoniseli 17. Nakanisaki: “Mpo na nini Olingi ete nátánga yango?” Nabandáki kotánga. [Ndeko Branham alelisi misapi na ye—Mok.] Kaka ntango namonaki yango: “Yango mpenza.” Nazuaki ekomeli mpe nakomáki yango. Nalobaki: “Yango mpenza.”

²²¹ Sikawa, bazolobaloba na ntina na ngai ndenge natélemelaka bibongiseli. Ezali likambo ya bankómbó ya kotúka wana, oyo bamibengaka “mangomba ya Nzambe, mangomba ya Klisto, ná mangomba ya ba-Methodiste, mpe mangomba.” Ezali ba-loge, mangomba te.

²²² Lingomba moko, ezali Lingomba ya Nkolo Yesu Klisto. Mpe Ezali nini? Nzoto oyo emonanaka te ya Yesu Klisto, oyo ezali kosala na mokili, oyo esalemi na binama ya biyanganelo nyonso oyo, baoyo balingi kozala binama ya Nzoto ya Klisto. Osengeli kobotama kati na Yango, bakótaka kati na Yango te.

²²³ Mpe kokóta na oyo wana, ezali bankómbó ya kotúka, mwasi oyo. Mwasi oyo, nguya na ye!

²²⁴ Bomoni sikawa esika oyo bazolinga kokende kozua bato nyonso oyo bazálaka na makanisi ya ndenge mosusu na ntina na kosambela, mpe kotinda bango na Alaska. Bomonaki yango. Kondima na biso nyonso ya ndéngé.

²²⁵ Mpe ezali nini? Likita, Lisanga ya Mangomba ya Mokili mobimba mpe ba-Katoliko bazali kosala likita na bango ya monene na Vatican sikawa, kuna, epai bazali koluka kosala yango. Ba-episikópo nyonso wana, mpe bongo na bongo, bazali koluka koyokana, mpo na kobundisa communisme. Mokili ezali kobundisa communisme, mpe bazali bobele kokota na Bokatoliko.

²²⁶ Kaka lolenge ekomi lelo. Tokómi wana, ndenge nalobaki. Toko . . . Tosili kokóma pene na kokweya mpenza. Tokómi kodefa mpe kosalela mbongo sikawa, na ba-mpáko oyo ekofutama

nsima na mibu zomi na minei. Yango nde mosika ndenge tokei mpenza. Nani azalaka na mbongo ya mokili? Lingomba Katoliko. Akodefisa yango ndenge nini na Etats-Unis? Mpo na kobátela ba-kompani ya makaya ná ya whisky, ná nyonso wana. Na ntembe te, bakodefisa yango epai na bango. Ntango bakosala bongo, bakoteka makoki na bango ya bokulutu, na mbala moko, na lingomba Katoliko ya Roma. Tozali kosangana. Botala yango malamumu, ezali mpenza polele, polele koleka kotánga zulunále. Yango oyo. Bomoni?

²²⁷ Bazali ba-Metodiste, ba-Batiste, ba-Presbiterien, mpe bongo na bongo, komibengáká “Lingomba ya Nzambe.” Ba-Katoliko ná makambo nyonso ya ndenge wana ezali nguya ya nyama oyo atondi na bankómbó ya kotúka. Komibengáká: “Nazali . . .” Nalobaki . . .

²²⁸ Nakendeki na lopitalo awa, eleki ntango molai te, nasengelaki kobondela mpo na moto moko. Nalobaki: “Tolingi ko . . .” Ezalaki mama na ngai. Nalobaki: “Tolingi kobondela mpo na mama.”

Mpe mwasi yango alobaki: “Benda ridó wana.”

Nalobaki: “Ozali Moklisto, boye te?”

Alobaki: “Tozali ba-Metodiste.”

²²⁹ Nalobaki: “Matondi. Nakanisaki ntango mosusu ete ozalaki mondimi.” Nabéndaki kaka ridó yango zinga-zinga na ngai. Bomoni? Boye, soki ozali Moklisto te, wana ezali ndenge mosusu. Bomoni?

²³⁰ Kasi: “Tozali ba-Metodiste,” ezali botúki. Nyama, mangomba, oyo ebengami mangomba, ezali mangomba te. Nalingi koyeba mpenza ete ekoti na bande. Iyo. Ezali mangomba te. Ezali ba-loge. Bato bakótaka kuna kokóta.

²³¹ Kasi okoki te kokóta na Lingomba ya Nzambe na bomoi. Babótamaka kati na Yango, na libatishi ya Molimo Mosanto. Mpe soki obátisami na Molimo Mosanto, Molimo Mosanto akotia elembo na banguya oyo kati na yo, mpe na yango: “Ye oyo abotami na Nzambe asálaka lisumu te.” “Akoki te.” Yango mpenza. Oh! la la!

Tokoki kolobela yango mokolo mobimba, boye te?

²³² Lingomba ezali Nzoto ya Klisto oyo emonanaka te, ebotami na Péma ya Nzambe. Wuu! Bosósoli yango? [Losambo balobi: “Amen.”—Mok.] Lingomba ya Nzambe ebotmi na Péma ya Nzambe. Nzambe apémaki Péma na zóló ya Adama, na nzela ya molimo, mpe ye akómaki elimo ya bomoi. Boyebaki ete ba-pantekotiste, to Lingomba ya solo ya ba-pantekotiste, ebotami na Péma ya Nzambe?

²³³ Bótika nátángela bino likambo moko, mwa moke, na ntina na yango. Bozela, mwa moke. Santu Yoane, nabanzi, yango nde nakotánga. Tokomona soki ezali bongo mpo na Lingomba ya

Nzambe, to te. Santu Yoane, bozela, nabanzi ete ezali pene na 16, 19; 20. Malamu. Awa, nabanzi tokomona yango, awa. Malamu. Tika ete nátángela bino, mpe tokomona soki Lingomba ebotami na Péma ya Nzambe, to te, lokola Adama azalaki, na ebandeli. Bótala malamamu.

Mpe na mpokwa na mokolo yango, mokolo na yenga, wana bikuke ekangami mpe bayekoli bayangani mpo na kobanga Bayuda, Yesu ayaki mpe ateleme na katikati na bango, mpe alobaki na bango ete, Kimia ézala na bino.

Esili ye koloba bongo, alakisaki. . . bango maboko na ye mpe mopanzi na ye. Esika . . . Bayekoli basepeli wana emoni bango Nkolo. Mpe Yesu. . .

Mpe Yesu alobi na bango lisusu ete, Kimia ézala na bino: Pelamoko Tata na ngai atindi ngai, . . . ngai mpe nazali kotinda bino.

²³⁴ Bótala malamamu. Tata oyo atindaki Ye akotaki kati na Ye. Mpe Yesu, ntango Atindaka moyekoli, Akendaka kati na ye. Kaka Ye moko oyo atindaki ye; Nzambe.

*Esili ye koloba boye, apemeli bango, mpe alobaki. . .
Bózua Molimo Mosanto:*

²³⁵ Lingomba, ebótámá na Péma ya Nzambe! Ntango epimelo oyo esili kotelema kuna mpe elengelami, na lolenge esengeli, Péma ya Nzambe epémamaka likoló na bango: “Bozua Molimo Mosanto,” na ntango wana okómi mwana na Nzambe. Okoki kokóta na eloko nyonso oyo olingi kokóta, kasi obótamaka nde na kati ya Lingomba ya Nzambe na bomoi, kobótama na nzela na Péma ya Nzambe. Nzambe apémaki likoló na bango mpe alobaki: “Bózua,” huh, “Molimo Mosanto.” Oh, la la! Yango wana mpenza.

²³⁶ Ezali te: “Yaka kokóta, komísa nkombo na yo kuna.” Ná ba-féti na bino ya mpokwa ya komeláká súpu mpe nyonso oyo etambolaka ná yango, okoti nde na loge. Okoki kokóta na loge Metodiste, na loge Batiste, na loge Presbiterien, na loge Katoliko, to na loge Pantekotiste, na nyonso olingi kokóta na yango, kasi ozali nde kokóta na loge.

²³⁷ Kasi na ntango okómi mwana na Nzambe, obotami na nzela na Péma ya Nzambe. Amen. Malamu kotika likambo yango, kaka wana sikawa. Malamu.

²³⁸ Na bongo Bomoi ya Nzambe mpe ekómi kati na yo, ndenge Yesu alobaki. Bozela naino. Yesu alobaki: “Ngai nazali Mobímbi. Bino bozali bitape.”

²³⁹ Sikawa bótala. Kokamatana na bango ná Yesu ezalaki nini? Kokamatana na bango ná Yesu, ezalaki mpo Ye azalaki Moto ázomikómisáká Nzambe. Azalaki Nzambe. Nzambe azalaki kati na Klisto. Bomoni? Mpe Ayebisaki bango yango. Alobaki:

“Bótala Ngai te. Ezali Ngai te. Ezali Tata na Ngai, Ye nde afandi kati na Ngai.” Oh! Bomoni?

²⁴⁰ Sikawa, bango bazalaki kotala mwa nzoto oyo ebotamaki na Maria. Bomoni? Oyo wana ezalaki Nzambe te. Wana ezalaki Mwana na Nzambe, kasi Nzambe azalaki kati na Nzoto wana. Ezalaki Nzambe. Alobaki: “Soki Nazali kosala misala ya Tata na Ngai te, boye bókweisa Ngai. Kasi nani kati na bino akoki kokweisa Ngai na lisumu, kozánga kondima Liloba? Liloba nini oyo Nzambe alobáki, oyo ezangi kokokisama kati na Ngai?” Lisumu ezali kozanga kondima. “Nani kati na bino akokweisa Ngai na ntina na lisumu?” Lisumu ezali kozanga kondima. “Bólakisa Ngai. Soki Nazali kosala misala ya Tata na Ngai te, na bongo bóndima Ngai te. Kasi soki Nazali kosala misala ya Ngai. . . Ata bokoki kondima Ngai te, bóndima misala oyo Nazali kosala, mpo yango ezali kotatola.” Na elobeli mosusu: “Tata azali kati na Ngai, kotatoláká na ntina na Ye moko.” Mpamba te: “Nzambe azalaki kati na Klisto, kozóngísáká mokili na boyokani ná Ye moko.” Bosósoli yango? [Losambo balobi: “Amen.”—Mok.]

²⁴¹ Ee, sikawa, Bomoi moko oyo ezalaka na kati ya Mobímbi ezalaka mpe na bitape. Bokokóta kati na Yango ndenge nini? Ekoki kosalema te.

²⁴² Namonaki nzete moko kala mingi te, na lopango ya Ndeko Sharrit na Arizona, ezalaki na mbuma libwa ya ndímo ndenge na ndenge. Ezalaki nini? Ezalaki nzete ya—ya malálá, malálá navel. Kasi ezalaki na—ezalaki na—na citron, na mandarine, na tangelo, mpe na pamplemousse. Ezalaki na yango ya ndenge nyonso. Natelemaki, natalaki nzete yango. Mpe nalobaki: “Ndeko Sharrit, olingi koyebisa ngai ete nzete yango ezali nzete ya malálá?”

Alobaki: “Bongo mpenza.”

²⁴³ Mpe nalobaki: “Ee, ndenge nini? Esalemi ndenge nini?” Nalobaki: “Nazali komona pamplemousse *awa*, ná mandarine *awa*, tangelo *awa*, ná citron *awa*, ná bambuma mosusu nyonso oyo. Esalemi ndenge nini?”

Alobaki: “Ee, omoni, bitape na yango ebambamaki na nzete ya malálá.”

²⁴⁴ “Oh!” Nalobaki: “Ee, nalingi kotuna yo likambo moko. Sikawa, ntango okobuka pamplemous ná citron oyo. Sikawa, na mobu ekoya, ekosala nini? Ekobota na ntango wana malálá.”

“Oh, te.” Alobaki: “Ekobóta citron. Omoni?”

“Oh,” nalobaki, “natondi yo.” Bomoni?

Okoki kosala yango te. Okoki komikotisa te.

²⁴⁵ “Kasi,” alobaki, “mbala nyonso oyo nzete yango ebakisaka mobu moko mpe ebimisaka etape ya sika, ekobimisa malala, soki mobimbi yango moko ebimisi etape yango.”

246 Mpe oyo biso tomekaka kosala ezali kokóma bandimi oyo babakisami na kati na Ye, mpe oyo bazali kobika na nkombo ya Boklisto. Mpamba te, tozali, ndenge elobamaka mingi, tozali mbuma ya ndimo, Lingomba ya Baklisto.

247 Kasi ntango Mobimbi Yango moko ebimisaka mobimbi, ekozala lokola Mobimbi ya liboso oyo Ebimisaki mbuma. Soki Mobimbi ya liboso oyo Yango ebotaki, bakomaki Buku ya Misala nsima na Yango; soki Etikali kobimisa mobimbi mosusu, Ekokoma buku ya misala na nsima na Yango. Ya solo.

248 Boye, bozali kaka kokóta na ba-loge. Kasi ntango obotami uta na Mobimbi yango. . . Ozali na mbuma. Ezali solo. Ozali na mbuma, kasi osalaka na yango nini? “Bozali na lolenge ya kosambela, kasi bowanganaka nguya na yango.” Bowanganaka bilembo. Bowanganaka bikamwa. Bowanganaka Molimo Mosanto. Bowanganaka minoko na sika. Bowanganaka bimononeli. Bowanganaka masakoli. Bowanganaka lobiko na nzoto. Mpe, ata bongo: “Bomipesaka nkombo.” Kokamwa te ndenge Molimo Mosanto alobaki: “Nguya, etóngá ya bato batondi na bankómbó ya kotúka, ya solo mpenza, bazomibengáká ‘Baklisto.’” “Bazali na lolenge ya kosambela, kasi bazali kowángana nguya na yango. Zalá mosika na bato ya ndenge wana, mpo bato ya lolenge wana nde bakambaka basi ya zóba, oyo batondi na bilulela ndenge na ndenge.”

249 Bibongiseli ndenge na ndenge! Lingomba etondi na masangá ya *boye*, ná masangá ya ndenge *wana*. Bolobi nini mpo na lisanga ya Yesu Klisto? Bomoni? Tozali na makambo mosusu nyonso oyo, mpe tomemisi lingomba mokumba. Sikawa tala esika ekómi.

Okoki kokóta na Lingomba ata moke te.

250 Okótaka nde na loge. Okómaka mondimi ya loge, ya etonga moko ya bato, kaka lokola na loge moko. “Biso tondimaka *boye*. Tozali na mitindo na biso. Tozali na ba-sekelé na biso, mpe bongo na bongo.” Bosalaka ndenge moko, longola kaka ete bokótaka na oyo ebéngamaka lingomba.

251 Kasi okoki kokota na Lingomba te. Bokótá nde na loge ya bandimi, kasi ya Lingomba te mpamba te babótamaka na kati ya Lingomba ná Mobimbi Yango moko.

252 Sikawa bozela mwa moke. Bótala malamumu. Nakosilisa, nsima na mwa ntango. Bótala. Bólimbisa ngai. Na—nalingaki koloba yango te. Bótala malamumu. Bótala.

253 Soki Nzambe atongáká Mwasi na libala na nzela na Molimo yango, na bongo Atongaka moto na moto na nzela na Molimo yango, bomoni, na bongo babótamaka na kati ya Bokonzi yango. Na bongo Bomoi mpenza oyo ezalaki kati na Lingomba *oyo*, ezali mpe kati na Lingomba *wana*, ná oyo *Wana, Wana, Wana, Wana*. Mpe Bomoi mpenza oyo ezalaki kati na mposo, Mobimbi, Yesu, ezali na enama oyo Ye asili kobimisa. Nkembo! “Makambo moko oyo Ngai nazali kosala, misala oyo Nazali kosala, bino

mpe bokosala yango.” Oyo wana nde enama ya solo ya Nzoto ya Klisto, nkombo moko te ebambami ná Yango. Misala mpenza ya moto yango etalisaka polele epai ye aútá. Bomoi na ye etátolaka oyo ye azali.

²⁵⁴ “Ozali enama ya eloko nini? Ozali eteni ya nzoto nini?” Ya Nzoto ya Klisto. “Ee, okótelaki Yango wapi?” Nakotaki te. Nabótámá kati na Yango. Bomoni? Nabótámá kati na Yango.

²⁵⁵ Ozali na ntina ya koyebisa bango yango te. Bayebi nini esalemaki. “Yo, ndenge nini okoki kopelisa mwinda mpe kotia yango na nse ya mbeki?” Alobaki bongo. Bomoni? Te, te.

²⁵⁶ Ntango obotami na kati na Bokonzi na Nzambe, na bongo ozui Bomoi, Bomoi mpenza oyo ezalaki kati na Yesu. Na bongo okómi na mposa ya kosunga milimo. Na bongo ozali lisusu na ntina ya kobóndela bato te, mpo báya na etumbelo. Ozali na ntina ya kobóndela moto te, koya komibakisa ná baoyo bazali na etumbelo. Iyo. Ma—ma—ma—makambo ekómi kotambola yango moko, mpo Etiami elembo kati na yo. Okómi bomoto moko ya Nzambe. Otiámi elembo ná Molimo Mosanto.

Sikawa boyebi eloko nini “Molimo Mosanto” elangi koloba?

²⁵⁷ Elingi koloba te: “Napumbwaki mpe nagángaki. Namiyokaki ndenge mosusu.” Nyonso wana ezali malamumu. Napumbwaki mpe nagangaki, mpe namiyokaki ndenge mosusu. “Nalobaki minoko na sika.” Nandimaka ete Molimo Mosanto alobaka minoko na sika. Ya solo. “Nasilá kolimbola yango.” Iyo, misie. Nandimaka yango mpe. Kasi ezali Yango te. Yango te nde nazolobela. Lidusu moko ekoki kozala wana esika moko. Lidusu moko ekoki kozala *awa*, na kati ya motema molai na yo.

²⁵⁸ Soki moto amamoli yo mbata na litama moko, na elongi, opesaka ye litama mosusu? Kasi yo olobaka: “Mokosi ya salite wana!” Boye lidusu moko ezali na esika moko, ezali kotangisa. Malamumu tótika likambo yango. Malamumu. Kasi boyebi nini nalingi koloba.

²⁵⁹ Kasi soki otiami elembo na kati na Nzoto ya Klisto, na ntango wana otóndisami na Molimo, mpe okómi mwana na Nzambe.

²⁶⁰ Oh, elingaki kozala malamumu soki nazalaki lisusu na miníti pene na zomi, mpo na kotánga likambo moko awa. [Losambo balobi: “Kende liboso. Tánga yango, ndeko.”—Mok.] Kasi bokolinga koyikela ngai mpiko ná miníti zomi mosusu? [“Iyo.”] Nalingi kotánga likambo moko, ya moke mpenza. Sikawa, na bosembo, madesu ekozika te. Ya solo mpenza, bomoni, soki tokotánga yango na miníti moke mpenza. Eleki malamumu mpenza ete nakoki kotika yango te. Nazali kaka na makambo mibale to misato awa, oyo euti koyela ngai na makanisi, mpe nalingi koloba yango.

261 Tózua Santu Yoane, mokapo ya 3, ezali kolobela likambo ya Bomoi na Seko. Tótala naino eloko oyo Yango elobi awa mpo na likambo ya Bomoi na Seko, Bomoi ya Nzambe. Sikawa, bótala malamau awa.

Moto moko na Bafalisai azalaki, nkombo na ye Nikodeme, moko na bankolo na Bayuda:

Bongo ye wana ayei epai na Yesu na butu, mpe alobi na ye ete, Labi, toyebi ete oyei molakisi uta na Nzambe: . . . moto akoyeba te kosala bilembo oyo . . . soki Nzambe azali na ye elongo te.

262 Sikawa, bango, bisámbiseli ya ba-Sanhedrin wana, bayebaki ete Azalaki Mwana na Nzambe. Bayebaki yango. Tala moyangeli na bango azalaki mpenza wana, alobaki na Ye: “Toyebi ete Ozali Molakisi uta na Nzambe, mpo Bomoi mpenza ya Nzambe ezali kotiôla kati na Yo.” Bomoni? “Toyebi ete malakisi na Yo euti na Yo Moko te. Euti na Nzambe, mpo Nzambe azali kondimisa Yango.” Bomoni? “Bomoi na Nzambe ezali kotiôla kati na Yo.” Sikawa bótala malamau.

Yesu azóngisi monoko mpe alobi na ye ete, Solo, . . . nazali koloba na yo ete: Soko moto akobótama lisusu te, akokoka komóna bokonzi na Nzambe te.

263 Oh, la la! “Soki okoti na lingomba na ngai te”? Oh! Bomoni ndenge batángwe mosika na Yango? Bomoni? Bomoni?

Yesu, bongo Yesu azongisi monoko ete, Solo, solo, nazali koloba na yo: Soko moto akobotama na mai mpe . . . Molimo te, akokoka koingela na bokonzi na Nzambe te.

Oyo ebotami na . . . mosuni ezali mosuni; mpe oyo ebotami na . . . Molimo ezali molimo.

Ókamwa te ete nalobi na yo ete, Ekoki na bino kobotama lisusu.

Mopepe epepaka epai yango elingi, . . . Bomoni, ekendeke mpe ezungaka, bomoni, ekendeke mpe ezungaka, bomoni.

Mopepe epepaka epai elingi yango, . . . yo okoki koyoka mongongo te . . . okoki koyoka mongongo na yango, kasi okoki oyebi te soko euti wapi, to soko ekei wapi: ezali mpe boye na ye oyo . . . abotami na Molimo.

Nikodeme azongisi monoko mpe alobi na ye ete, Makambo oyo makoki koya boni?

Yesu azongisi monoko mpe alobi na ye ete, Yo molakisi na Yisalaele, mpe oyebi makambo oyo te?

264 Tala likambo wana, ndeko, mo—Docteur na Bonzambe, Docteur na Philosophie, mbala mibale Docteur na Droit, bomoni: “Mpe oyebi makambo oyo te?”

Solo, . . . nazali koloba na yo ete tozali kosolola mpo na yango esili biso koyeba, mpe tozali kotatola mpo na oyo esili biso komona; nde boyambi litatoli na biso te.

265 “Biso toyebi makambo yango. Tomóná yango. Biso toyebi Yango, kasi bino bozali ata koyamba litatoli na biso te.” Moto na komibakisa na lingomba! Omoni?

Soko nasili koloba na bino mpo na makambo na mokili, mpe bondimi te, bokondima boni, soko nakoloba na bino. . . makambo ya likolo?

266 Sikawa bóyoka likambo oyo. Bólanda malamu.

Moto moko te asili kobuta kino likoló, bobele ye oyo akiti longwa na likoló, ye Mwana na moto oyo azali na likolo.

267 Bomeka naino kosósola yango.

268 Boyebi, mokolo moko, Alobaki: “Okanisaka nini mpo na Klisto? Azali Mwana na Nani?”

Balobaki: “Mwana ya Dawidi.”

269 Alobaki: “Bongo mpo na nini Dawidi, na Molimo, alobaki na Ye: ‘Nkolo alobaki na Nkolo na ngai: “Fánda na loboko na Ngai ya mobali”?’ Ndenge nini Akokaki kozala Nkolo na Ye mpe Mwana na Ye?” Moto moko te atunaki Ye likambo mosusu.

270 Na Emoniseli, Alobaki: “Nazali Mosisá mpe Mokitani ya Dawidi.” Bomoni? “Nazali Mobímbi mpe Etape. Nazali ebandeli. Nazalaki liboso na ebandeli. Nazalaki ebandeli, mpe—mpe Nazalaki lisusu Mokitani na Ye.”

271 Sikawa, awa Alobaki: “Moto moko te asilá kokita longwa na Likoló, longola bobele Mwana na moto oyo azali sikawa na Likoló.”

272 Mwasi moko atúnaki ngai motuna moko, mokolo moko. Nalobaki: “Yanola ngai na motuna oyo.”

Alobaki: “Yesu abóndelaki nde nani, na elanga ya Getesemani?”

273 Nalobaki: “Azalaki kolobela Nani ntango Alobaki: ‘Moto moko te asilá komata na Likoló, longola bobele Ye oyo akitaki longwa na Likoló, Mwana na moto oyo azali na . . . oyo azali sikawa na Likolo? Nani?’”

274 Tala Ye oyo awa, ateleme kaka awa na motóndo ya ndako, kosololáká na Nikodeme, mpe Alobaki: “Nazali na Likolo.” Ezali solo? Tótika yango bongo mpo na mpokwa. Bolobi nini? [Losambo balobi: “Amen.”—Mok.] Ntango ekómi mosika koleka. Oh, la la! Tika ete bómaniola yango mwa moke, na nsima ya nzanga oyo.

275 Bakotaka na Lingomba ndenge nini? [Losambo balobi: “Na mbotama.”—Mok.] Na mbotama. Na nzela nini? Na Péma ya Nzambe.

Péma likoló na ngai, péma likoló na ngai;
Molimo ya Nzambe na bomoi, péma likoló na
ngai.

²⁷⁶ Yango nde libondeli na ngai: tika ete Molimo Mosanto ápema. Oh, la la! Mpamba te, Péma ya Nzambe, Ezali nini? Kotiama elembo na kati ya Bokonzi na Nzambe, koyeba ete na ebandeli, ntango nayámbolaki, nandimelaki Yesu Klisto. Iyo.

Na bongo, na Kondima na ngai, nabakisi nguya, nguya ya búlee.

Na nsima, na nguya na ngai, nabakisi boyébi ya Liloba.

²⁷⁷ Na boyebi na ngai, nabakisi komipekisa, komikonza. Nalingaka yango. “Mboka na ngai, yo nde nazali koyemba, latisa elimo na ngai motóle ya komikonza, longwa na mbu kino na mbu oyo ezali kongenga.” Bomoni?

²⁷⁸ Motema molai. Oh, la la! Komekama. Komitungisa te; Satana akotángela yo yango. Nazali komata na ebuteli yango sikawa. Bomoni? Nabakisaki nguya, boyébi, komipekisa, sikawa nasengeli kobakisa motema molai. Nazui naino Molimo Mosanto te.

²⁷⁹ Na bongo, nsima na ngai kobakisa motema molai, nabakisi bosantu. Boyebi nini yango ezali? Kozala lokola Nzambe. Nabakisi yango. Nazali na ezaleli ya mabe te. Nasálaka ndenge Moklisto ya sembo asengeli kosala. Ézala eloko oyo namisaleli te. Eloko moko kati na ngai, bolingo na Nzambe, nde ezali kotoka. Bomoni? Bomoni? Koloba te: “Ah-ah-ah-ah, oh, la la! Nakokaki kosala yango, kasi ntango mosusu malamú násala yango te.” Bomoni? Ah-ha. Ah-ha. Ezali wana, ata ndenge nini.

²⁸⁰ Ezali Mbotama. Nabotami kati na *oyo*, kati na *oyo*, kati na *oyo*, kati na *oyo*, kati na *oyo*, kati na *oyo*. Na nsima bolingo ya Nzambe, Klisto, akiti mpe atii elembo na nyonso wana kati na ngai, mpo na mosala. Bomoni?

²⁸¹ Na bongo Akosala nini ntango Apesi ngai Molimo Mosanto? Atii yo pembeni na esika oyo ya yo moko, ná elembo. Bomoni? Na ntango wana okómi moto ya ndenge mosusu. Ozali lisusu ya mokili te. Bomoni? Olati ndenge mosusu. Olati elamba ndenge mosusu. Moláto oyo ya libanda te. Te, te. Ozali na ntina te ya kozala ndenge, mpe moto ya ndenge mosusu, ná bilamba ya kingo babalólá, mpe kosala molúlu ya molai, ndenge wana. Te, te. Okosála yango te. Na nzoto, okoláta boye. Elamba ya molimo nde ezali na ntina. Balatisi yo elamba ya libala. Okómi nini?

²⁸² Lokola Yesu, botala, Azipamaki, mpe Abóngwanaki wana, liboso na bango, bilamba na Ye ezalaki kongenga lokola moi. Tala Ye wana, Yesu, Nzambe azotiáká Mwana na Ye moko na esika. Bomoni? Mpe na nsima Mose ayaki. Na nsima Eliya ayaki. Mpe Petelo alobaki: “Boyebi, ezali—ezali likambo moko malamú kozala awa.” Bomoni ndenge moto akómaka? Iyo.

Oh, ekamwiseli eutaki kosalema! Alobaki: “Tótonga mingombo misato. Tótonga moko mpo na Mose, moko mpo na Eliya mpe moko mpo na Yo.”

²⁸³ Mpe liboso ásilisa koloba, Nzambe akangáki nyonso wana, alobaki: “Oyo azali Mwana na Ngai ya bolingo. Na makambo nyonso oyo Ngai naséngaki na Mose, mpe nakomaki na mobeko na nzela na Mose; boyengebene na nzela na basakoli; Ye akokisi nyonso wana. Boyoka Ye. Ngai nakomitia pembeni sikawa. Bóyoka kaka Ye. Bóyoka kaka Ye.” Oh, la la! Oyo likambo moko kitoko!

²⁸⁴ Na bongo na ntango tokokisi masengeli oyo, mpe totondisami na banguya ya Nzambe ná makambo ya Nzambe, nsima nde Molimo Mosanto akitaka mpe atiaka biso elembo kati na Bokonzi. Komitungisa te. Moto nyonso akoyeba ete ozali na Yango. Okozala na ntina te ya koloba: “Ee, nkembo na Nzambe, nayebi ete nazali na Yango. Nalobaki minoko na sika. Nkembo na Nzambe, nayebi ete nazali na Yango. Mokolo moko nabinaki na Molimo.” Okozala na ntina te ya koloba liloba moko na ntina na yango. Moto nyonso akoyeba ete ozali na Yango. Komitungisa na yo te. Iyo. Ekotatola na ntina na Yango moko. Akosala ete bato báyeba yango.

²⁸⁵ Nzambe ápambola bino. Nazali na esengo mingi ya kozala awa elongo na bino na ntongo oyo, ya kolekisa ntango ya bondeko oyo. Bóyoka, mwa losambo na biso ezali moke, mpe tozali na esika mingi te ya kofándisa bato oyo bayáka awa. Tozali ebongiseli te. Tondimaka mpe tozalaka na bondeko ná ebongiseli nyonso. Boyáka awa mpo bolingaka koya. Mpe bino, tolingaka bino. Mpe tolingaka ete bibongiseli nyonso, bato nyonso. . .

²⁸⁶ Nandimaka ete bato oyo bazalaka na bibongiseli nyonso wana bazali Baklisto. Bazali bandeko mibali mpe bandeko basi kati na Klisto.

²⁸⁷ Boye, yango wana, tozalaka na ekanganelo moko te, eloko moko te ya kokóta kati na yango, eloko moko ya kosala te, bobele kozala Moklisto. Ndenge E. Howard Cadle azaláká koloba: “Tozali na mobeko moko te bobele bolingo, buku moko te bobele Biblia, endimeli moko te bobele Klisto.” Ezali solo. Bóyoka kotala biso. Tosepelaka na yango. Bisu tondimaka Nsango-malamu Mobimba, eteni moko na moko ya Liloba. Tondimaka yango mpenza ndenge wana. Tobakisaka eloko moko te na Yango, tolongolaka eloko moko te na Yango, tobakisaka eloko moko te ya bibongiseli na Yango. Totikaka Yango kaka ndenge Ezali. Esili. Mpe tozalaka ntango nyonso na esengo ya koyamba bino. Bóyoka kozala elongo ná biso ntango bozali na makoki. Tobondelaka mpo na babeli. Tondimaka nyonso oyo Biblia elobi ete tósala. Tozali “kobosana bolembu na biso, kotika yango na nsima, mpe tozali kopota mbangu kino na Ebiangeli eleki likoló.”

288 Sikawa, likambo mosusu. Bokopesa nzela ete élobama? Na ntongo ya mokolo wana liboso na lobi. . . Bokomona yango kuna na—na etánda, emononeli moko. Namonaki emononeli moko. Ezalaki pene na ngonga ya mitano, ndenge mwasi na ngai kuna na nsima ayebi, to ya motoba. Nautaki kolamuka. Tolamukaki mpo na kobongisa bana mpo bákende na kelasi.

289 Ekómelaka ngai mbala na mbala. Mpe bino nyonso boyebi, bino nyonso oyo bozalaka awa, ete ekweyaka ata moke te. Yango ebongaka mpenza be. Bomoni? Ekweyaka ata moke te.

290 Mpe namílobelaki ete nazalaki moto ya esengo koleka oyo nasilá komóna. Natelemaki na nse ya moi, m-o-i, mpe nazalaki—mpe nazalaki koteya Nsango-malamu na eyanganelo moko ya monene mpenza.

291 [Ndeko Branham apemi—Mok.] Nalingaki koyeba soki ezali kotiana na bande.

292 E—eyanganelo moko ya monene mpenza, mpe bato bafandaki na kati ya zamba. Mpe mwa moi moke ezalaki kongenga likoló na bango, mwa moke *awa* mpe *kuna*, bazalaki koyamba Yango, koyamba Liloba.

293 Mpe ngai, na momesano, natéyaka ntango nyonso ntango molai, naumelaka, nazuaka ntango molai koleka. Mpe nateyaki ntango molai mingi, kino bato na eyanganelo bakómaki na nzala ya bilei ya nzoto. Mpe bango, bamosusu kati na bango, balembaki. Na bongo batélemaki, bakendeki koluka bilei, babandaki kobima.

Nalobaki: “Bóbima te. Bóbima te.”

294 Nazalaki na makambo mibale ya minene oyo nazalaki na mposa ya kolobela, oyo nazalaki na mposa ya kolobela, na liteya na ngai. Mpe Nkolo nde autaki kopesa ngai yango. Mpe motei nyonso ayebi, ntango oyebi mpenza ete Nzambe nde apesi yo yango, opelaka moto mpo na koyebisa bato.

295 Mpe, Charlie, nazalaki mpenza koteya na makasi na ngai nyonso, kofandisa mpenza likambo yango, boyebi, mpe koloba: “Makambo minene nyonso oyo, makambo *oyo* Nzambe azali kosala. Bótala likambo *oyo*. Asósolaka makanisi ya mitema. Ezali nini? Liloba.” Mpe nazalaki kokóba ndenge wana. Mpe, oh, elingaki kozala malamumu ete nákokoka komikanisela makambo oyo nazalaki koloba ná mokonza ya liteya na ngai. Nazali lisusu koyeba yango te. Bomoni? Kasi nazalaki mpenza koteya.

296 Mpe nazalaki komimona kosala yango. Bongo, wana etelemaki ngai wana, kotaláká, mpe nazalaki komimona koteyáká Yango.

297 Mpe nazalaki mpenza koteya na moto nyonso oyo akokaki koyoka ngai. Mpe nsima na mwa ntango, namísembolaki, boyebi, mpe nakanisaki: “Nkembo na Nzambe!” Nalobaki: “Tálá makambo ya kitoko mingi oyo, ná *oyo*, ná *oyo wana!*”

²⁹⁸ Na mbala moko, namonaki ete bato babandaki kokóma lokola bazalaki mpenza na nzala ya bilei ya nzoto. Bongo, balembaki mpenza bilei ya molimo, na bongo babandáki kokende na bango. Mpe bamosusu kati na bango [Ndeko Branham asali lokola moto azali kobayé—Mok.] babandáki kokende na bango.

Nakanisaki: “Likambo nini ekómeli bato nyonso?”

²⁹⁹ Mpe—mpe natalaki, mpe bilenge babálani moko bazalaki koleka, pembeni na ngai. Namilobelaki. . . Nalobaki: “Zela naino, moninga! Zela naino! Bokoya lisusu ntango molili ya mpokwa ekoyinda.” Bomoni? Nalobaki: “Bokozóngá lisusu. Kasi bótika ete náyebisa bino likambo ya monene oyo ya liboso. Makambo nyonso oyo nauti kotalisa bino euti wapi? Yango euti wapi?” Nalobaki: “Yango oyo. Ezali na kati ya Liloba na Nzambe. Ezali YANGO ELOBI NKOLO, elaka na Ye. Mpo,” nalobaki, “bino nyonso bozali batatoli na ngai, bosílá kobikela yango, ete etinda na ngai ezali: ‘Tikálá ná Liloba.’” Nalobaki: “Likambo nini ekómeli bino nyonso? Bozali kosósola Liloba te? Bosengeli kosósola Yango.”

³⁰⁰ Bamosusu kati na bango balobaki: “Oh, nakosepela mpenza kolia mwa mápa,” mpe bongo na bongo, ndenge wana.

³⁰¹ Ee, namilobelaki: “Ee, nkembo na Nzambe! Soki bazali na mposa ya mápa, tika ete bákende kozua yango.”

³⁰² Boye na—nabalukaki. Namilobelaki: “Oh, kasi, boyebi nini? Molili yango elingi koyinda, nsima na ntango moke, sika-sikawa.” Nalobaki: “Na bongo, na mpokwa, ntango eyanganelo yango ekoyangana lisusu, nakotalisa bango likambo ya monene yango, mpe nakoyebisa bango ete makambo basili komóna ngai kosala ezali na kati ya Liloba na Nzambe, na buku moko boye ya masapo to na ebongiseli moko boye te. Ezali na kati ya Liloba. Bomoni? Eteni moko na moko na yango ezali na kati ya Liloba, mpo natindámá mpo na Yango.”

³⁰³ Namilobelaki: “Oyebi, bango nyonso bakoya lisusu na mpokwa, na bongo, nakosala nde boye. Nakozóngela, nakozóngela yango mwa moke.” Boyebi ndenge nazalaki kosala mpo na bileko ya lingomba ná nyonso wana, nazalaki kozóngela makambo oyo nalobáki liboso. “Nakozóngela yango, na Liloba, na nsima nakotalisa bango likambo ya monene mpe kokamwa oyo.” Nalobaki: “Ekozala ntango moko kitoko! Nzambe ákumisama!” Mpe namimonaki ndenge nazalaki kokóma moke mpenza, mpe nayokaki ete, “Nzambe ákumisama.” Namimonaki ete nazalaki kolimwa ndenge *wana*. Mpe nazalaki awa, natelemaki wana.

³⁰⁴ Sikawa, ndimbola na yango ezali boye. Bomoni? Likambo ya liboso oyo nasalaki, makambo oyo esalemaki, bato bazalaki kososola yango mpenza te, mingi kati na bango. Nazali kolobela bato ya Nsango-malamu Mobimba ná basantu ya Nzambe te,

kasi, nazali kolobela, epai na bato mingi koleka. Mpe bosengeli ata moke te kotálela mokili, kosmos, lokola Nsango ya Nzambe. Ntango bobandi koloba . . .

³⁰⁵ Ndenge Boze alobaki: “Ntango nyonso ngai . . .” Alobaki: “Nalotaki ndoto moko, eleki mibu mingi, ete—ete Nzambe akotinda ngai na Chicago mpo na koningisa Chicago mpo na nkembo na Nzambe.”

Nalobaki: “Joseph, Asili kosala yango.”

“Ee,” alobaki, “baningisamaki lisusu te uta eleko ya Moody.”

³⁰⁶ Nalobaki: “Baoyo wana? Ngai nazali kolobela Lingomba. Baoyo wana bazali bato ya kobeta masasi. Baoyo wana bazali kaka putulú ya mabelé, bato oyo batelenganaka na babalabala, ba-Yezabele oyo bapakólá-pakólá ná nyonso wana.” Nalobaki: “Baoyo wana bazali libanda. Ba—loge minene wana ná nyonso wana ekobukana mpe ekokweya kuna na ba-balabala.” Nalobaki: “Ye azali kolobela Lingomba. Lingomba oyo bamoni emoniseli ya Yesu Klisto kotalisama polele, mpe bazali koyeba Yango. Ntango mosusu bakoki na bango kozala zomi na mitano te na Chicago. Ntango mosusu bakoki na bango kozala zomi te na ekeke oyo, baoyo bakobima na engumba mobimba ya Chicago.”

³⁰⁷ Bosílá kokanisa na ntina na likambo yango? “Ndenge esálemaki na ntango ya Noa, ekosalema mpe bongo na Boyei ya Mwana na moto, epai wapi milimo mwambe nde ebikisamaki.” Ah-ha. Bato boni babimaki na Sodoma? Bomoni oyo nalingi koloba? Nandimi te ete bakokaki kozala mitano. Bomoni?

³⁰⁸ Kasi Lingomba Yango moko esili koningisama. Bayebi yango. Bayebaki Liloba. Bamonaki Liloba ntango Ezalaki kotalisama polele, mpe bayambaki Yango. Sikawa bótala yango mwa moke, sikawa.

³⁰⁹ Mpe Nsango ya liboso oyo, ntango bamonaki Yango, bato nyonso bazalaki kosepela na Yango, balobaki: “Oh, nkembo na Nzambe! Oh, soki nakokaki komona likambo *oyo*, *wana* mpe *mosusu*.” Mpe bakei na bango mbala moko, kaka ndenge bakotaki. Bomoni?

³¹⁰ Sikawa bakómi kokanisa: “Ee, nayebi te. Tokokóta esika nini? Soki nayei *awa* te, ekosalema *boye*. Mpe bakobengana ngai, awa, mpe *awa* nakozala na eloko moko te.” Bandedko bafandi wana mpe balobi: “Ee, nakosala nini soki ngai . . .?” Bomoni yango? Bazelaka mpenza te mpo na koyeba ete Ezali Liloba oyo Nzambe alakaki nde ezali kotalisama polele. Bomoni? Mpe bakendeki na bango.

³¹¹ Kasi, bómitungisa te, molili yango ekómi pene mpenza, bomoni, ntango nakozonga na elanga.

³¹² Bozali koyeba lisusu, na mpokwa mosusu wawna, Nsango oyo Apesaki ngai kuna, ntango nazalaki kotia libanga ya litúmu? Ya solo mpenza. Alobaki: “Sálá mosala . . .” Alobaki: “Ntango

okobima na emononeli oyo, tanga Timote ya Mibale mokapo ya 4.” Boyebi, ezali kuna na libanga ya litúmu, eleki mibu ntuku misato na misato.

³¹³ Alobaki: “Sálá mosala ya évangéliste, kokísa lotómo na yo malamú mpenza. Mpamba te ntango moko ekoya, oyo bato bakoboya koyoka Malakisi ya sembo; kasi lokola bazali na mokosa ya koyóka makambo oyo esepelisaka mposa na bango moko, bakozua balakisi mingi; bakolanda masapo ya lokuta . . . kotika Solo mpo na kolanda masapo.” Likambo yango esili kokokisama mpenza, liloba moko na moko! [Maloba mazangi na bande—Mok.]

³¹⁴ Kasi, bomikanisela, lisusu, na mpokwa mosusu wana, natángáká naino eteni oyo etikali te. Na mibu koleka ntuku misato oyo nateyaka na tabernacle oyo, ata mbala moko te natángáká eteni wana etikali, mpe nayebe te mpo na nini.

³¹⁵ Nazalaki komituna mingi, kino, mokolo moko, namonaki epai Yesu azuaki Búkú mpe abandaki kotánga, atángaki ndambo ya lisakoli yango mpe akataki mpe alobaki, kuna na Kapernaume, Alobaki: “Lelo oyo, lisakoli oyo ekokisami.” Mpo na nini Atángaki eteni oyo etikali te? Ezali kolobela Boyei na Ye ya mibale. Bomoni?

³¹⁶ Mpe kino wana, nasiláká kotánga yango, kozanga koyeba. Nazuaki yango, mpe tala ezalaki wana, liboso na ngai mpenza, na Southern Pines, na Caroline du Sud. Na ntongo yango, natelemaki wana, nazalaki kosolola na Joseph Boze, ayékamaki na mopanzi ya motuka, nakangaki likambo yango. [Ndeko Branham alelisi misapi na ye—Mok.] Polo alobaki: “Ngai . . . Bato nyonso babalukeli ngai. Moto moko te azali elongo na ngai. Demasi asundoli ngai; alingi mokili ya lelo. Sikawa ngai . . .” Botala. “Mpe motúli ya bibende esaleli ngai mabe mingi.”

³¹⁷ Bótala ndenge Demasi asengelaki kokanisa: “Ee, namonaki Polo koteya Nsango-malamu mpe kobikisa babéli. Mpe ye oyo afandi, azali na mpasi, ye moko, azali kotámbola ná monganga moko elongo na ye, Luka. Mbala nyonso akendeke, amemaka mónganga moko elongo na ye, moto oyo atéyaka Nzambe. Ee, namóná ye koboma miso ya moto moko. Alobaki: ‘Nkolo ápamela yo, okozala mokufi miso kati na eleko moko.’ Mpe atiki ete motúli ya bibende ábengana ye na liyangani. Nabanzi abungisi nguya na ye ya koboma bato miso te. Mawa, asili kobungisa nguya na ye ya lobiko na nzoto uta na Nzambe. Nzambe asili kobalukela ye.”

³¹⁸ Nandimi te ete Demasi azóngaki na mokili, mpo Demasi autaki na . . . Boyebi histoire na ye. Autaki na libota monene ya bazui. Akómaki na mposa ya kolanda bamosusu.

³¹⁹ Kasi, Polo, mwa Polo moke wana. Ezalaki nini? Nzambe atikaka ntango nyonso ete lotómo ékóma ndenge wana, na nsima alátisaka yango motole.

320 Atikaki ete Yesu ákóma na esika wana. Bótala kuna. Na ntango Akokaki kosekwisa bakufi, na ntango Akokaki kosala nyonso oyo Alingaki; bongo kotika sodá ya Roma moko ápikola Ye mandefu na elongi, mpe kobwakela Ye nsoi na elongi. [Ndeko Branham ayokisi makelele ya moto abwaki nsoi—Mok.] Abetaki Ye na . . . Azingaki Ye eteni ya elamba na elongi, mpe alobaki: “Sikawa, Oyebi, bayebisi ngai ete Ozali Mosakoli.” Bango nyonso batelemaki zingazinga ná bakékélé, mpe babetaki Ye na motó. [Ndeko Branham abeti eloko moko.] Alobaki: “Sikawa yebisa biso nani abeti Yo.” Ayebaki nani oyo abetaki Ye. Ah-ha. Ya solo mpenza. Ayebaki. Bomoni? Kasi lotómo na Ye elingaki kolátisama motole.

321 Ekómaka ntango nyonso na esika wana, oyo emonanaka lokola ekómi mpenza, mpenza na bolembu, pene na kosuka mpenza, nsima nde Nzambe alátisaka yango motole.

E Nkolo, tika ete ésalema. Tika ete ésalema, Nkolo.

Tógumba mitó.

Nalingi Ye, nalingi Ye
Mpo Alingaki . . .

Sikawa bókumbamela Ye. Touti koyoka malakisi moko ya makasi.

Mpe Asombi lobiko na ngai
Likoló na Ekulusu.

322 Tótombola maboko sikawa epai na Ye.

Na . . .

Sikawa bózala kati na Molimo, bomoni: “Nalingi Ye.”

. . . Nalingi Ye
Mpo Alingaki ngai liboso.
Mpe Asombi lobiko na ngai
Likolo na Ekulusu.

323 Sikawa, tótelema.

Tokoyemba mwa loyembo na biso ya bokabwani, eteni na yango ya liboso, tokopesana mbote ya loboko; molongo ya mibale, tokoyemba yango mpo na Nzambe. Malamu. Na nsima nde tokosilisa.

Sikawa, tóyemba:

Mema Nkombo na Yesu elongo na yo,
Mwana ya mawa ná bolozi;
Ekopesa yo esengo mpe libondisi,
Mema Yango esika nyonso oyo okokende;
Nkombo kitoko, O ya boboto!
Elikia ya mokili mpe esengo ya Lola.
Nkombo kitoko, O ya boboto!
Elikia ya mokili . . . Lola.

324 Sikawa, bóbosana yango te, sikawa. Nakosenga na elenge ndeko moko, awa, oyo nautaki kozala ná ye na biró, kala mingi te; e—elenge ndeko moko ya motuya, azali missionnaire na ba-Assemblée de Dieu na lisobe kuna; nabosani nkombo na ye, nakosenga na ye ete ásilisa na libondeli, nsima na biso koyemba eteni oyo elandi:

Mema Nkombo na Yesu,
Lokola Nguba liboso na motambo nyonso;
Mpe ntango masenginia mazingi yo,
Loba bobele Nkombo Mosanto wana na
libondeli.

325 Bongo okomona ndenge milimo mabe ekokima. Bomoni? Sikawa, bóbosana te:

Mema Nkombo na Yesu elongo na yo,
Lokola Nguba liboso na motambo nyonso;
Mpe ntango masenginia mazingi yo,
Telema, mpe loba Nkombo Mosanto wana na
libondeli.

326 Tala eloko nini ekosalema. Malamu. Bisó nyonso elongo sikawa.


Mema Nkombo na Yesu elongo na yo,
Lokola Nguba liboso na motambo nyonso;
Wana masenginia mazingi yo, (Okosala nini,
sikawa?)
Loba bobele Nkombo Mosanto wana na
libondeli.

Nkombo kitoko, (Nkombo kitoko!) O ya
boboto! (O ya boboto!)
Elikia ya mokili pe esengo ya Lola.
Ya motuya . . . , (. . . ? . . . bomoni mwana mwasi
wana . . . ? . . .) Oh kitoko mingi! (Yaka awa,
molingami.)
Elikia ya . . .

327 Wana botelemi awa: Mbala ya nsuka nazalaki na tabernacle, awa (Mama na ye azalaka kaka koseka mpe kotalisa mwana na ye.), mwana oyo azalaki kolata bibende ya bibosono. Ye oyo, azali kokima-kima zingazinga awa, kosakana malamú lelo. Kitoko mingi, boye te? Nkembo na Nzambe. Sikawa, tálá awa: Cherie, pumbwa mpo na kolakisa na baoyo bazali kuna ete okoki kokima zingazinga. Bomoni?

Oh, Nkombo kitoko, (Bóbosana te, Elambo na
mpokwa, sikawa.) . . . ya boboto!
Elikia ya mokili mpe esengo ya Lola.
Nkombo kitoko, O ya boboto!
Elikia ya mokili mpe esengo ya . . .

³²⁸ Sikawa tógumba mitó. Mpe bóbosana te liyangani ya mpokwa, sikawa; mpe ezali mpokwa ya Elambo. Mpe bino nyonso bóbosana yango te, bino baoyo bozali Baklisto, tobéngisi bino ete bóya kolia Elámbo elongo ná biso. Tozali kozela kolekisa ntango moko ya nkembo.

³²⁹ Mokengeli na biso ya motuya oyo, Ndeko Neville, ná . . . Bato boni balingaka Ndeko Neville? Bóloba: “Amen.” [Losambo balobi: “Amen.”—Mok.] Bóyoka, bandeko, bóyoka ngai lokola oyo ya bino . . . lokola moko na bakengeli awa na tabernacle: Bókangama makasi ná Ndeko Neville. Bókangama ná ye. Bomoni? Azali mosali ya Klisto. Bókangama ná ye. Biblia elobi: “Tika ete tósangana elongo: mpe koleka mpenza wana bozali komona mokolo yango ya mabe kobelema.” Bóyaka na mayangani, bóyaka; tóyaka awa mpe tózalaka pembeni na mokengeli na biso. Bomoni? Bózalaka elongo ná . . . 

62-1104M Bankómbó Ya Kotúka
Branham Tabernacle
Jeffersonville, Indiana U.S.A.

LINGALA

©2025 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamú ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, koméla:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org